

鄉園憶舊錄

鄉園憶舊錄卷三

濟南王培菴雪嶠輯

長山劉公一相爲高平尹王踈菴家宰過之公出其子  
鴻訓及同窗二孫一張并館師王五人課菴請政踈菴  
覽之驚曰皆卿輔才也安得萃處一室館師文雖工福  
遠不及諸子後孫公居相壬辰進士張公金銘庚戌進  
士官皆至尙書孫公鼎相戊戌進士官副都御史鴻訓  
癸丑進士官東閣大學士館師王家礎亦壬辰進士選  
涇陽知縣赴任卒於途

吾東鼎甲甚少終明之世狀元僅三人宣德丁未臨朐

馬愉萬曆戊戌益都趙秉忠若洪武丁丑武定韓克忠  
謂之夏榜狀元先中狀元陳郊福建閩縣人時主考劉  
三吾白信蹈取中宋琮等五十一人大江以北無一登  
第者殿試後下第諸生上言三吾等南人私其鄉上怒  
命儒臣再考落卷中文理長者第之於是侍讀張信侍  
講戴彝右贊善王俊華司直張謙校書嚴叔載正字童  
貫長史黃章紀善周衡蕭揖及郊昌隆諤各閱十卷或  
言三吾信蹈囑信等以陋卷進呈上益怒謂其藍胡餘  
黨命刑部拷訊磔殺張信等惟戴彝尹昌隆得釋劉三  
吾以老成邊陳郊劉諤安置威寧後召歸亦被誅上復

親賜策問取韓克忠等六十一人皆山東山西北平河南陝西四川士也世稱春夏榜又謂南北榜以此是科夏榜榜眼王恕亦山東長清人

吾東秋闈號舍明時最少家司農公嘗以爲言當時不及五千之數後來漸增第狹隘已甚其逼仄處兩人對面不能過一人負簞側身而行入場深以爲苦當事者編席棚爲號又慮火燭道光年間各上憲勸紳士捐修無不踴躍撤而更新增添號舍寬廣高壯以石鋪路遂爲他省所莫及猶有餘金放商生息爲每科卷資大憲嘉惠士林之盛心諸紳士好義之勇均不可忘後來或

未經前此之苦但樂目前之便恐日久以爲固然也故  
誌之

國初鄉會試不分省無定額順治乙酉科山東本省及  
應京兆試中者共九十五人丙戌會試山東中九十九  
人聯捷者四十九人聊城傅以漸爲狀元後大拜阮亭  
戊戌殿試時山東六十三人惟阮亭爲前科進士是科  
中額無如山東鄉試會試後乃分省鄉試有定額山東  
設四氏學編耳字號另闕每科中者皆聖裔孔氏人多  
故也康熙間請增一名各賢裔始有中式者雍正間又  
恩加一名共額六十九名嘉慶間又命駐防滿洲就近

入闈遂有七十二名

子若瀛字子步濟寧衛人萬曆癸未進士除戶部主事  
歷官右僉都御史巡撫陝西卒贈右副都御史有弗告  
堂集朱竹垞云子步詩格未超然不屑作輒熟語晚投  
清江浦云淮水吞江浦孤帆晚復開樹移沙岸轉波逆  
海潮迴人語迎邨雜漁燈拂櫂來繫舟猶未穩寒漏已  
頻催兩宿潼關云明燈虛館淒清夜細雨蕭蕭亂客腸  
秋入關門悲鼓角年來驛路老星霜家臨濟水菰蘆白  
壠接南山黍穀黃千里故園愁阻絕夢還京國亦他鄉  
自注云時寄家京邸清泉寺云滿谷西風椒葉稀穿林

片片凍雲飛荒原車馬應無數閒殺山僧坐翠微

龔勗字懋卿章邱人以歲貢生官江都訓導轉威縣教諭再遷開平衛教授有龔懋卿集朱竹垞云懋卿少貧牧羊豕山中手書卷不釋旣而小吏誣其逋租受笞益發憤力學見李中麓以詞曲名恥之銳意學古文辭時稱爲醇謹君子

萊陽宋公繼登備兵嘉湖夜有白猿竊其衣冠服之搨鼓升廳事時海寧袁秀才祿畱公幕中猿入臥室披其帷秀才大慙公命隸卒環守而援之往來如故也朱竹垞云童子日偕諸昆弟行精嚴寺街人爭聚觀謂猿方

坐鐘樓啖果子審視獨未之覩

劉翊字叔溫壽光人正統戊辰進士累官太子太保戶部尚書兼謹身殿大學士卒贈太保諡文和有古直先生集文和詩率意塗寫不事翦裁亦間有合格處其送龍溪潘榮宗用詩云同年喜有九尚書九尚書中有歷城尹恭簡公敏字同仁恭簡與著瑣綴錄之尹直大有君子小人之分漁洋辨之最詳九人皆正統十三年進士得諡者八人洵一榜之盛

山東北鄙與直隸接壤地多斥鹵水鹹土瘠日夕風起黃沙眯目行者苦之烏程朱長春字大復其宰陽信狀



海濱風土如海暗雲連舍春寒雨近城沙田惟種黍鹵  
井不通泉過雨如霑雪無風自落沙白沙風裏下黃日  
霧中生薄祿供囊藥齋廚費水錢頗盡其致他如折藕  
露華白采菱秋水香悠然西湖曲坐對南屏山高樹晨  
光動空山眾響聞麥花來社燕小雨破春泥落日餘高  
柳空江起暮鐘酒船晴盡出賽鼓暝猶聞纜外春沙沒  
鐙前獨樹斜蒼藤緣戶結翠鳥落階飛驛火依沙出春  
星傍浦懸孤飛江上鳥半滅雨中山皆秀句也晚學修  
真鍊形蓋不得志而有託蒙叟訕其登梯累十重學狎  
舉而墮地幾殞殆未必然

大復萬曆  
癸未進士

明山東參政余公名寅字君房鄆縣人少時夢人曰君  
命同孔子家居時年七十三無恙後二年奉川產一麟  
獻太守守使吏來白公曰吾其死矣果卒嘉慶二年丁  
巳冬山東平度州牛產麟東萊姜生桂林往觀繪祥麟  
圖劉寄菴題之云一夕光芒動天地千里百里客麇至  
老牛倏產麒麟兒此是人閒未有事麒麟不畜公卿家  
高明甲第連雲霞荒村寂寞門巷小牛宮一把茅蓋遮  
又云頭上童然少獨角難定似龍還似鹿自是初生未  
長成想見疑疑亦不觸搖曳一尾如塵長滿身鱗甲堅  
有光大小方圓狀非一鱗閒圍繞毛赭黃聞生侯姓家

未久卽死按龍與馬交產馬腹有鱗日行千里謂之龍馬龍與牛交所產有角有鱗歧蹄長頸與圖經所載略得麒麟彷彿世人未見真者故妄謂之麟史書所載麟間有火或焚其棚其爲龍種無疑又麒麟自麒麟自麟以有角無角分雌雄概謂之麟非也見其一卽謂之麒麟亦非也嘗見李鏡安玉臺室懸一圖云明時某官目覩命工繪之後足短前足長頸高聳長過其身頭無角厥狀甚怪按此西域阿丹國所獻命羣臣縱觀故得圖之此特一國所產如是非麟皆如是也嘗見其書記之甚詳一時忘其書名

或又云麒麟大者獲麀是麀字此又一說

史元中鹿泉知魚臺縣事值歲大祲盜賊起有簡瑞者  
爲盜魁善運稍馳馬出沒官道鹿泉以計縛之簡臥庭  
下瞠目曰吾左手持稍右短兵橫行千里閒今爲書生  
掩取天也公笑曰汝輕書生邪卽起著短衣持其所用  
稍運之左右迴旋如舞匹練忽稍斷爲三擲示簡曰汝  
稍豈足用耶簡叩頭稱死罪乃繫之獄至冬月將論決  
簡求見公曰身亦山東男子不敢負公乞假十日一生  
別老母公卽縱之去眾皆懼及期先一日簡就獄離魚  
臺三十里爲獨山大盜劉儀久嘯聚其中有眾數千開  
府曾公銑議進剿以公爲前鋒旣擇日陳兵禡祭畢公

知獨山有謀者在軍乃命植一竿百步外公手挾矢誓曰某以書生任將兵若一舉滅賊當三矢中此竿時萬目齊注監司諸將俱色變公從容三發三中呼譟震地是日公卽察得謀者三人釋其縛賜以美酒食笑謂曰汝來觀吾射邪謀者股栗盡吐賊虛實及所入獨山徑道公立提兵襲其寨擒劉儀還曾公大喜方論薦公會曾公遷制三邊尋爲相嵩所害赴市鹿泉歎曰事尙可爲邪卽日挂冠歸里時年四十二家居復四十年守令思一造見不可得老益貧惟賣文以自給云

元中鄞縣人

樂天東坡守杭州以詩人置之詩地可謂人地相宜不

獨善政垂世其詩亦美不勝收矣濟南瀟洒似江南黃山谷詠之曾子固知濟州雖不能詩亦多篇什蓋山水助興也明嘉靖中蒲圻魏寰字順甫以部郎出知濟南雪霽同友登王子山云畏路誰能到幽懷我獨偏谷中初見日樹杪忽聞泉倚杖青山色銜杯白雪篇交游仍舊俗風景入新年題白雪樓云郢調淒涼思轉幽卜居還倚鮑山邱初疑海氣能成市不道仙人獨有樓乘興好看明月上登高長嘯白雲秋琴心自在誰堪識且聽巴人下里謳

明鄉試直隸取百名加國學三十名又禱行五名故曹

鼎以典史解糧赴京中北直隸鄉試山東有張驛丞鄉  
試中式提學畢瑜贈詩云一官恥不與清流忙裏遺編  
自校讐枳棘豈能畱彩鳳鹽車未必困驂驪東藩領薦  
名初顯西蜀題橋志已酬脫却樊籠入佳境春雷萬里  
步瀛洲觀此不獨北直有雜行應試外省亦有之後無  
矣

山東提學趙鶴字叔明登岱詩云山壓星辰從下看海  
浮天地自東迴句甚奇李獻吉有云日抱扶桑曜天橫  
碣石來宗子相稱其有芥視岱宗杯量滄海之致如趙  
亦何可及也

叔明江都人宏  
治丙辰進士

明諸王分藩於外害政者固多而禮賢下士亦頗有之  
青州衡莊王邸起高樓東向眺遠樓成王於望後四日  
置酒召客時日景既盡疎星尙微王未肅客坐憑闌語  
笑已而月上王歡甚因命曰待月樓請客賦詩鄆縣呂  
中甫以避仇客厯下轉至青州在座詩云川原夕氣交  
暝色自相向月猶藏海底人已坐樓上王賞擊謂得待  
字義手觴奉之俾居客右晚客瀟宣王所客死河南中  
甫年六十治生壙於句章之夕陽里自撰墓銘後十年  
乃卒歸櫬葬焉詩品在中麓夢山之閒同時曳裾王門  
者多遜之

中甫與李中麓揚夢  
山唱和故相等耳



歷城殷棠川相國士儋嘉靖丁未進士是時李子鱗以詩主盟海內公其同里著有金輿山房集金輿歷下山名也論者謂體齊魯之雅馴兼燕趙之悲壯采吳越之婉麗是吾鄉一巨手予觀其題蕃馬圖云玉塞無聲夜有霜橐駝五萬入漁陽平沙落日悲風起馬上橫捎四白痕氣概雄偉音節宏亮實堪與滄溟樹旗鼓公武英殿大學士贈太保諡文莊明詩綜以爲諡文通誤也蒲柳泉志異紀公遇狐娶婦事甚奇公固貴人爲鬼狐所畏卽以詩論亦足辟易千人

初諡文通後改

李希梅堯臣號約菴邑諸生工古文漁洋山人云按之

八家尺度不爽毫黍嘗代漁洋作文不獨雜之漁洋文略可以亂真中敘兄弟讀書及庭前花木如身履其地親出其口莫辨其爲代作也漁洋賞歎故爲不虛著有百四齋文集十卷詩一卷約菴精於書法著筆勢一卷明書譜二卷後人名金式者善書人得其尺幅多珍藏之家學然也

軒轅氏吾邑有之後人無知去軒但稱轅鄉間略識字者書其姓又去車旁書袁蚩蚩者任人呼馬呼牛不知辨人而與袁姓通譜古人云子孫雖愚經書不可不讀科名有無不足道此等深可懼也又邑西有公孫莊傳

爲公孫宏故里淄川古般陽縣隋開皇時始改貝邱爲  
淄川漢蒲川在臨淄雖不相遠要不得假其許田爲我  
有居是里者有公孫氏亦未嘗以遙遙華胄自居而猶  
知已爲覆姓可怪者鄰黨往來呼其男曰孫兄呼其婦  
曰公嫂但取便于口恐人亦如軒轅氏耳

德州蕭共辰嗜酒飲必醉醉必吟詩佳句如犬息千村  
月鷄鳴萬井烟山從雲外起水向樹中流月印寒潭靜  
雲籠晚樹開山深晴帶雨塞極暑生寒樹影穿花徑山  
陰落草堂月吐中峰小雲歸遠樹深山高分月影岸闊  
散江聲吞山雲四面繞水樹千林林鳥將烟出山雲帶

雨來芳草棲牛犢殘曛上客船  
劬北愁中客江南夢裏  
家嶺樹連雲動村烟帶戶開

畢濟川先生世濟好讀書家貧登樹巔隨月光而讀屢見賞於宗工每入秋闈取俗稱爲油燂菓者飽食過平日五六倍矮屋中不造飯三日但飲茶而已某科鄉試中魁選題爲君子學道二句破題末句煞尾無虛字通篇文奇崛古若不遵常解主司賞跋可謂具眼入春官試天氣偶熱脫衣裸處號軍稟官扶出自此不應試而讀書不輟性孤峭見俗客瞪目視不語人目爲瘋子語先君曰不瘋不能避俗生平喜食甜瓜偶悅一妓命人

呼至使妓脫衣仰臥已亦解衣跨其腹預買瓜滿籃踞坐嚼瓜盡整衣而起卜其晝不卜其夜終不與妓交言其行事不循常軌而狷介自矢晚年與妻一室分處授受不親一物之微有投必相報深於易自爲註解冊用敬神黃紙寫用鎊煤珍藏不與人見一夕爲火所焚大痛謂生平精力盡於此書及此天也青州某縣令不知書縣試日揭書至後生可畏章遂寫生可畏命題書吏稟云題少一字卽添一焉字人傳爲笑先生卽據題作文甚工妙其才如此不與世諧若古獨行傳中人物後修志當入隱逸一門

錢香樹尚書陳羣跋自書與劉諸城倡和詩冊後云客  
有盛稱諸城相公制義功深屢掌文衡所錄多士文皆  
可矜式惟詩學未必如香樹原本三唐爲後進楷則耳  
子聞而撫掌曰客稱諸城制義好信然詩學不及老夫  
何所見耶客無以對乃隨手取拙詩中與諸城倡和之  
作付讀客頷首曰近年始得大集僅讀過數卷不謂先  
生之服膺諸城乃爾也子與諸城還往詩什不多錄此  
以見片羽一斑均足寶愛如此越數日客持此冊來歸  
曰末學後生悔未讀秋水篇耳遂綴此數語一笑觀此  
知文正之於詩深矣尙書南歸文正送以詩云歸愚歸

隱日公作送歸詩今日送公者誰爲絕妙詞金門諸彥  
集秋水片帆遲夢覺聞鳴櫓依依魏闕思一疏陳丹陛  
重綸下紫霄 睿文申眷注上壽錫松喬詩和猶三接  
兒扶更早朝俱蒙 優詔許詎待小山招豈弟存吾道  
恢竒聚藝文平原餘乞米內史詔鵝羣叱馭曾師古拔  
茅切救焚灑然存一老嘉惠四方聞從來膠漆意倍在  
別離時欲敘平生事難裁覩縷辭久隨丹禁地同筦白  
雲司尙有前期在鴛湖下釣絲烟水幾千里身輕放鶴  
初善酬 明主意勤請養生書有子辭金馬經時返玉  
除平安頰奏達不必覓雙魚

文正送沈歸愚詩最佳詩云幾年丹禁領仙官香案身  
依得駐顏特許歸田辭北闕應憐託興在東山朝衫舊  
著袍爲鶻里第新開客是鷗多少篇章供 睿賞豈惟

傳頌滿清班

當時送詩者甚多推公擅長

文正子文清公壩送香樹尚書詩云 帝廷有名卿藝  
苑有哲匠蘊真道爲鄰舒卷清風暢平生古處敦冲襟  
多雅尙吹噓寒谷温栽培弱植壯冰雪縈懷抱疏越朱  
絃唱天游謝畦畛嘯歌寄俯仰秋官頌皋蘇明慎欽時  
望云胡賦歸來養疴樂閑曠廿載侍禁林欲去 皇情  
注緬惟忠孝家朝野多嘉譽篇章以寵行眷眷行無遽



秋風理歸櫂迢遞江鄉路琴書六一舫藥裹少陵句宵  
涼夢偶成徘徊玉堂署庭薇映華髮階藥引閒步覺來  
烟水寬藹藹滄洲曙送別東門道冠蓋傾都城人要多  
宿德新知羅俊英及此桂光圓銀漢正斜橫洗爵壽君  
子中有灑露盈低徊詎可畱迅鶴隨雲征一髮是江南  
眼與山俱青湛湛長江水濯我無塵纓歸來把黃菊獨  
酌和淵明曩隨函丈初憶自辛壬歲及茲一星終弗諼  
周行惠深心有夙期引翼若不逮寅年六角書明明如  
月在裁詩悵離悵深虞言鮮愛鯉庭洽季昆風流更前  
輩豈惟文字緣古義相磨淬猶冀北飛魚時時寄清誨

續山左詩鈔載文正公詩一首忘爲何題載文清公題  
畫長古村樂圖前後薰蚊行俱傑作惜不記

嘗聞趙秋谷在天津詩酒遊讌徵歌選舞一時名姬皆  
爲品題久之乃知主之者爲俞爾望字肅瞻業鹺務饒  
於賞招致名流如姜西溟與秋谷輩供其揮霍誠豪舉  
也名亦因諸人以傳秋谷晚年目盲四方求詩文以詩  
文求正者不絕先生口占以授人又令人誦外來之作  
隨誦隨記卽加品評日三四人供役疲於奔命而先生  
從容自如也當時國初諸前輩漸次彫零巍然爲魯靈

光云

肅瞻以女妻香樹時方  
爲舉人可謂善擇婿矣

新城伊丹木桂乾隆辛未進士工於制藝其才筆敏捷  
一時無兩偶友人以文促其捉刀時正與人爲菓子戲  
問何題令具紙筆旁坐眼耳手口竝用不移時而就書  
者腕脫而先生從容門牌自若也與諸城劉文清公同  
年相善文清公督學南邦以書招致來札予嘗鈔錄疎  
古酒脫洗盡世閒浮套友人謂予曰先生非徒文字勝  
也拳勇亦復絕人知扶溝縣時以事入省過山澗甚寬  
木橋甚窄輿馬爲難乃令役爲導徒步從之對岸危坐  
一丈夫貌魁梧蒼髯及腹背插鐵鏑虎視役趨之起曰  
官至矣丈夫怒目曰官能斷行旅乎先生若爲弗聞也

者行漸近一腳飛起蹴之落湖蓋知爲匪人否則恐受其害也文多傳誦有勸其付雕者不應

鄰瞿塘忘機園大不盈畝茅屋三間編迎春花爲藩籬開時繞屋燦若黃金流水活活穿庭而過水底鋪石清徹無滓其中雜立石筍諸花芬郁屋前巨竹如臂摩戛雲日階植紅藥間以荼蘼之架芭蕉之林復堆石爲小山磊落嵌崎入其中者疑有千巖萬壑遊覽不盡忘其園之小也自號忘機老人日與文士談讌題詩滿壁自作五古閒雅稱其爲人所居村名昌城昌國君舊封之地也耿希尹題詩有云專心營造在一山得石且自勤

積累獨憐搜索費人功安得愚公一爲徙大石爲壘疊  
山腰小石爲礮互山趾不分列崎與層巒佇看咫尺烟  
嵐起今年結茅屋新成爲愛詞賦延文士窗外芭蕉三  
兩株夜雨聲聲滴入耳其餘蘭蕙芍薜隨意栽松竹森  
森傍沼泚先生產業已中落那能力辦復爾爾忘却物  
力盈與虧有癖如癡殊可喜閱詩可知瞿塘之爲人矣  
來蜀聞其已卒

沂水竇郡丞景燕幼年在塾聞人談黃河風景竊往觀  
日夕回師責其曠廢課業欲加責乃以實告不信述河  
上境物慙慙眾爲驚愕自沂水至濟南四百餘里每應

試一日而至偶欲遊京都觀瞻幾爲匪人掠去急遁歸  
餘京錢百文爲路費行步如飛蓋天生也乾隆間舉人  
爲滄州牧故盜藪也居官時自恃拳勇絕倫登房越壁  
如履平地手擒巨盜無數陞捕盜同知益奮力擒捉匪  
人歛迹其告歸也盜相慶結伴尋蹤將要於路而甘心  
焉追透千里終不敢發安得盡如其人落落散布天下  
乎

牟願相字直甫號鐵李陌人族弟也族有爲蒲臺學博  
者挾其古文數首簡質古峭非摹韓歐之貌以爲古者  
往往自跋其文尾謂所作文篇篇變化其實體格未變

特局陳變耳然能樹立不倚傍宜其自命不凡但未悉  
其生平劉次白中丞選入山左古文鈔

福山王餘枚跣不羈文筆敏捷目無餘子嘉慶甲子  
解元不刻硃卷自號王一箇眼中微有白鬚達官問之  
對曰目不見旁人其兀傲如此常見其所作足兵足食  
章大學平天下章制藝上下古今縱橫萬里皆洒洒千  
餘言如讀名臣奏議實可見之施行洵奇才也入春闈  
或作文僅二百字高老不可攀躋終不遇選教官條陳  
陋規宜裁學使惡之以不謹罷職有友官于南者招之  
往贈遺頗厚買妾而歸江行痛罵舟人舟人恨之半夜

瘖之水妾爲所轉鸞屢易主莫究所由來才人負氣往  
往殺身可惜也爲秀才時學使劉金門先生首拔之送  
入灤源書院後知其多爲人捉刀驅之出是科領解分  
其才可了十人

馬子琴號西坡名桐芳長山人蘇山舅氏壻余往外家  
見詩一冊洒然異之間之知爲子琴作是時年方十六  
也好遊蕩以詩見孟柳谷柳谷與舅氏善甚喜之謂舅  
得佳壻詩有咏孟氏掌柏雄奇恣肆記其五律有句云  
雲飛山欲動花落地還香未幾刻詩集舊作無一存者  
咏梅有絕無人處一枝寒五言有一蟲猶唧唧萬木盡



蕭蕭皆爲石子真所賞爲之作序旣而三刻其詩存者益少問其舊作茫然不記而新作或未勝前聽袁玉堂作詩須多讀書誤以飽飮爲富博而清真秀拔之骨淹沒大半曾致書規之不知其能從否也近作佳句謁閔子墓云蘆花秋水外菜色野園中和袁玉堂秋夕原韻月涼花影瘦風嫩竹聲微又如麥苗侵水綠松色入雲蒼濃花常滿院高柳自成村皆有風韻作詩話未成棄去繼而又作刻之亦不甚多名慙齋詩話未攜來川以天生詩才而不自愛惜初與王秋水遊詩近王孟至是乃莫知其趨向大抵五律勝七律五古勝七古晚年多

病行不離杖無子一女歸余子紹宗

孔繼涑號谷園曲阜聖裔十歲工書聘張文敏公照女未娶卒文敏以書法名天下谷園學之能亂真翁婿最相契文敏公歿純皇帝命涑摹其書以進稱旨謂極似張照深蒙賞賚人以爲榮鄉舉後屢困場屋考教習不收春闈榜後上命搜落卷中楷書工整者備選中書亦不遇平生精於賞鑒所蓄前人墨迹甚多與梁山舟先生彼此以家藏易觀互相評論皆具眼也所刻玉虹樓帖張公筆迹亦其鑒定與兄友愛最篤兄官戶部以事成邊谷園鬻產贖回姪入翰林旋卒身爲經紀

憂勞困頓以致疾病里居時於市肆中見其書鐵畫銀鉤力透紙背惜未買得至今爲恨

胡中丞太虛寶璵嘗撫吾東目能視鬼曾因葺屋巡視諸屋皆有鬼惟一室間然問之乃僕死其婦守節不嫁屋也婦亦常奴爲鬼所敬如此中丞詩夏然生造其佳句如珍珠萬顆暗行地靺鞨一奩明映天爲一時傳誦有盤山雲林石室詩云雲石天開峯巒通滿庭秋色簇煙叢倒看巖罅飛泉碧橫勒林梢返照紅靈境本來環渤澥仙蹤不用訪崆峒御題筆墨山光潤萬象俱涵雨露中

秀水盛百二字秦川丙子孝廉官淄川令博覽載籍善於考證所著書如周禮句解尚書釋天袖堂筆談續筆談棣華樂府皆刊行傳世其孫世綺言未刻者尚多也有題邱氏古樹云松柏參爲友於今六百春宅爲傳一姓樹肯屬他人苦節風霜飽青枝雨露新東臬他日約試一訪輪囷先生與先王父交善主樂源書院一時名流多所賞拔

陸郎夫中丞在山東善政最多嘗選山左古文巡撫湖南時夢中自贈云能開衡岳千重雪只飲湘江一杯水所選古文名切問齋集自性命身心以至家國天下無

不詳備務爲有用之學不徒取詞華也

陸公名曜

崔尚書應階巡撫山東觀風齊魯作四六一篇備極風華未知當時操筆出已手抑爲幕賓然其究心風雅可知也隨園詩話載其書扇贈歌者櫻桃云柳韉花嬌已斷魂春風空自與溫存歌筵一曲當年事猶識金環舊指痕後督浙閩自號研露老人

嘉慶甲子闈題謹權量一節江南亦是此題而山東此題先已開科解元爲呂濬初濬與同邑某交好某甚爲學使所賞擢冠一軍呂則四等也呂名下士因學使每考必有四等聊以試之爲戲笑闈後學使索某文閱某

以已文不嫌意鈔呂作呈進及榜發呂領解而元墨則  
某所呈也學使驚駭謂呂作弊召某問故某以實對猶  
不信以呂本四等何忽爲此文竝疑某有私告之撫軍  
覆呂三次無藝不佳乃止後某中進士爲方伯呂以孝  
廉終

劉大神號奇菴雲南人穎悟好讀書晝夜不輟太夫人  
恐其勞也取書置他所先生不知問妻妻詭言吾藏矣  
先生大怒詈之妻以實告時太夫人已寢乃偕妻跪太  
夫人室外至二更許太夫人憐而予之少年成進士任  
山東新城令不攜眷潔已愛民善書工詩日與騷人墨

客酬唱凡客入署不待報直入書室大吏至先生入謁  
闈者立而拱先生怒欲杖之大吏謝過乃已不取民間  
錢亦不奉上官一錢視去官如脫屣也適曹縣爲徵糧  
民大擾委先生往先生令民執斛自量不假胥吏不曰  
竣事曹大邑也上憲將調之新城民大懼訴於上臺曹  
縣民出而爭適方伯江公蘭以事出過新城民萬眾迎  
於野執香跪懇畱劉令時日已暮視之若星光萬點布  
滿四野江公云各上憲議已定奈何民間之齊哭聲震  
地仍伏不起江公不得已慰之曰俟回與撫軍議爲汝  
畱民歡呼聲亦震地乃未幾先生以前任曹縣失出事

罪至譴戍新城曹縣民出重金爲先生贖罪先生作贖  
歸引云出關何年無入關亦時有誰知七品郎官歸贖  
自兩縣百姓手官視百姓如仇警百姓視官豈父母云  
何兩縣風氣殊謫戍其官引爲咎或詛於社或祝神或  
聚而哭或狂走或欲慷慨三公陳或欲匍匐九闕叩其  
小人曰必歸公公不卽歸我顏厚其君子曰必歸公公  
之歸也義不苟又云青錢早信輸乞兒白璧不煩待良  
友風霜奔走皮膚皴道路哀號面目醜萬千人心同一  
心長安市上嘆未有春風策馬居庸還關內依依曳楊  
柳繪圖題詩篋筥盈其榮乃與使相偶凡三任新城視



如家新城亦視先生如父壽辰父老登堂而祝者屬集  
每罷任必居新城爭迎養之自遠來婦人孺子必夾道  
迎相笑樂先生亦喜與之絮絮道家常村農求書大書  
讓畔遺風大臣密薦陞青州司馬行將不次用矣俄乞  
終養歸方罷官歸里行至江盜劫鄰舟殺人眾聲訕訕  
一盜魁大呼曰勿驚山東劉青天先生有詩紀之云強  
弓毒矢莫肯加盜賊還能恕吾輩後入名宦祠

濰縣科第之盛或云前令鄒板橋先生變爲之修改某  
處以培文風未知果否先生工詩詞又喜畫蘭竹畫必  
題詩醉後狂書不衫不履如醉仙步武欹側偏跛中自

有超然出塵之致世多仿之如小兒把筆不值一喙嘗  
畫盆蘭送孫峩山先生歸里兼題詩云宿草栽培數十  
年根深葉老倍鮮妍而今歸到山中去滿眼名葩是後  
賢確切不可移易時雍正三年也後十三年復過德州  
峩山年八十二矣子十一人孫曾林立并見五世孫復  
出舊圖索題板橋走筆題云載得益蘭返故鄉天家雨  
露鬱蒼蒼今朝滿把蘭芽茁又喜山中氣候長風流佳  
話爲吾鄉添一故實一日肩輿出門羣丐環跪問何爲  
曰求賞畫卽畫乞兒圖擲之意態各殊皆具生趣丐歡  
躍拾去易酒共飲先生愛才士惟惡富豪見監生輒罵

駝錢驢或足踏其冠好乘驟調簾入省以封條貼騾鞍  
任誕多此類而善于爲政歲饑修城濬河民得勿餒告  
歸揚州四壁蕭然不廢絲竹作揚州詩云千家養女先  
教曲十里栽花當種田貧甚濰士民斂金往饋詩詞家  
書皆手書雕板寄弟書語語切要有聖賢語無語錄氣  
世以狂目先生不知先生者也先生友如吾東高鳳翰  
江南李鱣皆同調後入名宦祠

淄令易公煥暄當淄屢歉之後入省時各屬縣令皆以  
災故懇大府緩徵中丞曰方急兵餉若停徵餉何以辦  
無已停新徵舊可也及回邑將如議行吏役稟曰凡舊

逋皆係無力貧民若充裕之戶何至積欠新者猶可徵  
舊者雖敲扑無益也公曰今各屬俱停新徵舊淄何能  
獨異且何辭以復及期將比諸役及里長環跪乞哀曰  
窮民朝夕不給何以奉公公沉吟良久惻然曰可俱緩  
之闔人力言不可公不聽曰有我在復入省見制府曰  
淄邑屢歉新舊賦俱無能辦職已并舊者緩之矣制府  
愕然曰爾何獨異於各屬公曰職已出示諭眾無能再  
徵制府曰爾緩則緩之意色甚弗善也公知忤上官歸  
諭眾役曰吾官不可爲將以病告爾等迎新任可也于  
是具詳通稟以中風爲辭差家人卽發出城門騎不肯

行屢出屢奔回乃以多人執杖驅之須臾乘隙復奔回  
署家人怒繫于樹而箠以梃閹者問知其故止之曰且  
勿白于公曰此必有異其無行公曰或吾不必去乎姑  
聽之吾爲民雖罷官無悔也未三月而差往湖南造船  
矣蓋示罰也先是有予公書者曰君將有行急來省三  
千金可免公不可又曰千金亦可不然差出賠墊不貲  
公曰吾將爲歸田計雖百金亦不出也瀕行制府已調  
他省新制府命合屬助貲及往工所又得良友周旋旣  
無多費亦無遲滯歸後太府將畀以美缺不受仍回淄  
易公湖南湘陰人

濰縣劉次白先生爲中書選山左時文鈔蓋承雅雨先生山左詩鈔之例取高古者爲前集近墨者爲後集又選山左古文鈔皆表揚桑梓文獻爲功於鄉邦多矣先生兄弟同中丁卯鄉試同聯捷進士先生名鴻翱名鴻翥者爲縣令先生仕至福建巡撫今告歸太翁諱濟川嘉慶庚申舉人壬戌署吾邑學博荀初入泮場中文深蒙稱許回憶如目前事耳竊謂明時山左古文卓乎可傳者不少惜無如次白先生者爲之選擇久漸湮沒可惜也夫

邑李君名蕙在山西曾署某縣有大盜矯捷能飛度牆

垣挾人處女去不知所在案久不結李君有客俠士也  
擒之以女還民家客之械鐵柄長尺許上繫鐵練亦尺  
許未有鐵丸如茶碗輪舞如飛四面以石亂擊之不能  
入空拳博輒石皆碎黑夜以刀斫之能避視日光目不  
瞬曾言自南雇船來不知其爲盜也行至一所夜半聞  
呼曰有賊客與僕驚起結束畢啓門甫出艙艙上有人  
以巨斧劈其首客手鐵圈迎之斧錚然飛去卽有人以  
鎗直刺其胸復格落僕亦相繼跳出旁舟皆賊黨也登  
舟來助主僕交擊賊眾相次落水方喘息閒見舟忽旋  
轉剡磨驚曰此賊在水挖孔船已破矣急入鎗取小棹

浮水坐其上僕亦如之二人漂近岸遇救得不死

新城徐翁名勝仙好養菊秋時爛然盈庭與友人譙賞  
余外祖之鄰王翁亦養菊菊開邀徐翁來賞王翁六十  
餘徐翁九十餘矣每騎驢而來白髮飄飄清癯而健意  
洒如也一日至色不懌王問之曰今蚤有傷心事問何  
事曰適甥來云其母病死余適哭女歸也問女年幾何  
曰七十餘矣翁至百一十歲乃卒縣令嘗索菊於翁翁  
不與語人曰渠俗人安知賞菊

山東觀察使孫公星衍號淵如哀簡齋稱爲奇才

皇上見所撰褒以讀書人出京時大學士和珅戒之曰



今作外官矣才子氣要除公有詩云宰相教除才子氣  
至尊親許讀書人公祖母孀居食貧嘗以金三百藏僻  
處瀕用檢之不知誰何盜去家益窘一夜夢城隍迎至  
署曰偷兒係某夫人欲知其人否太夫人曰彼銀已用  
不願知其姓名城隍起敬曰皇天后土實聞斯言後福  
未可量也後夢神人自天而降抱兒送太夫人太夫人  
抱與其媳遂生公公貴迎養于署及身親見其盛天之  
報施善人固不爽也公爲秀才時與洪稚存黃仲則友  
善三人好議論喜逞才閭里目爲狂士負氣不願久之

皆入詞館以詩名天下

仲則係  
中書

劉金門先生鳳誥視學山東以內閣學士禮部侍郎加  
宮保異數也 仁宗皇帝建復過亭先生集四書句爲  
聯云過也如日月之食焉復其見天地之心乎以是受  
知荀子歲試入泮明年取優等小草不足當栽培第  
見所取試牘磊落雄奇一時才士無不賞拔覆試躬親  
搜檢諸弊皆絕發落生童他學使點名以過先生人人  
與語或獎勵或訓飭讀書作文無不詳爲剖示所見學  
使無如先生之精勤者一時文風振起往往拔其尤者  
入署相與論文痛飲益都諸生張姓忘其名取通府第  
一并索其平日五經文閱郵遞往返評其文有拜服之

至語人謂先生恃才而傲不知其虛心愛才如是後視學浙東是時中丞爲阮芸臺先生兩公同年友善阮狀元劉探花俱擅才華阮以事出奏以金門先生爲監臨途中蜚語先生于素所賞識闈中索閱文稿稍不當意輒指示令改蓋天性真率忘避嫌疑以是遭忌罷官謫戍未幾賜環 賞編修先生果于任事持正不阿山東一皂隸鉅富子孫應試釀成巨案各上憲皆右之獨先生持論侃侃公議始申使得大用其展布必有彪炳不朽者坎壈以終可慨也芸臺先生任山東學政在先崇尚經學及詩賦風氣亦爲之變下車出示自云本院學

疎才淺有大能謙如此金門先生在浙出示云本院手披萬卷目下十行人遂藉爲口實至編入謠諺論者以是分兩先生福澤之厚薄云

金門先生江西萍鄉人

泗水縣楚家寺僧慧朗臨終語弟子云吾將投曲阜顏考功宅詰朝來訪則修來先生得孫名懋僑字幼客人以爲慧朗後身幼慧博學工詩乾隆間有鴻博之試四方士雲集輦下關中屈悔翁復高自位置談詩排斥杜工部王侯拜榻下稱弟子後進罕得見幼客以陪祀入京年方少矚其在寓排闥直入屈跌坐榻上不爲禮幼客登其榻對坐不語屈不能耐問所自曰我曲阜顏懋

僑聞君能詩未知何如特來一談屈與往復辨若懸河  
乃折服自謝無禮遂定交幼客少學詩于王秋史秋日  
詩云白雁呼羣依遠渚晚風隨雨落橫塘嶧縣李小東  
太史呼爲小友嘗題畫云一松凍欲折一石飛欲絕落  
日風吹人寒氣碧成雪

張浦山畫徵錄載山東善畫者膠州法石黃若眞山水  
筆有奇趣鍾鐸字一士益都人官至觀察畫山水宗王  
右丞焦秉貞濟寧人欽天監五官正人物位置自遠而  
近由大而小不爽毫髮蓋西洋畫法也御製耕織圖秉  
貞奉詔作村落風景田家作苦曲盡其致鏤版以賜臣

僚冷枚卽焦秉貞弟子也膠州人尤工仕女周之恆字  
月如臨清人官江西參政後移家江浦工八分書朱竹  
垞稱之能詩善山水曹侍郎潔躬倦圃十二景是其所  
圖之恆侍郎門下士也朱虛字若虛號介菴別號夢栩  
道人官肅州副使工山水有名圖繪寶鑑續纂云鍾鏗  
邱壑嚴整位置得宜朱虛字介菴曹州人順治三年進  
士官參政善寫山水落筆蕭疎脫略蹊徑

蕭九成字韻亭日照人由學博中壬辰進士官翰林院  
檢討工畫山水謹守南宗深得麓臺筆意墨香居畫譜  
推爲山左第一

歷城陳嘉樂乾隆閒以畫名皇九子從之學畫見其所畫屏幃用筆老橫力破邊幅非時下描頭畫角規規於死格局者歿後其子食貧蕭然自得皇九子囑山東巡撫求其舊畫撫軍使首縣某往問吾淄高君薰謀與之善至其家問令來何事語之故且云已辭却高君曰吾見所存尙有何不獻之可得厚贈勃然曰先人手澤方欲收買以歸何云獻耶是時餅告米罄尙未舉火

張雪鴻敵原籍江南遊山東假商籍舉鄉試爲縣令工畫得之天性幼從師讀頑跳師以指點其額呵斥之卽竊繪爲圖神情逼肖長工花卉翎毛生趣滿紙居濟南

來遊吾淄所遺墨迹甚多性瀟灑遇權貴則意氣兀傲  
在京師友人處有達官來避入內室達官見壁上懸雪  
鴻畫甚愛重托主人代索餌以重金雪鴻聞之大怒不  
應爲令時藩憲面索其畫諾之遲久不納一日入省謁  
見藩憲曰公畫如此難求作而曰朝廷命職來作官不  
命職來作畫上官唯唯謝焉後以冒籍罷官畫荷花十  
二幅興思不屬奴子磨墨滿巨缸命以履投其中任意  
塗紙橫斜狼籍濃淡不一乃就墨藩點染俯仰偏側舒  
卷盡致雜以花實綴以蒲菰有若天然自謂生平得意  
之筆蓋極力摹擬終屬人爲此則有因物付物不以心



籍之妙非深于畫理者不知非深於文字禪者亦不知也又善雙鉤字筆意縱橫曲折極其飛舞胸有成字走筆攝取文與可所謂兔起鶻落稍縱卽逝者弟兄三人敷工文牧善書故妙于畫稱爲三絕

益都馮君名震善畫竹時人謂之馮竹名動一時余家有所畫長卷橫斜偃仰極蕭疎濃郁之致中有清流激湍橫貫其中鄭谷口篋題八分於卷首置篋中後失去石刻甚多其老筆揮洒氣象陰森具風雨離披之狀挺秀者新篁解籜清潤有骨皆可寶貴

歷城楊姓善畫蘭人謂之楊蘭忘其名于蒲臺趙氏處

見小幅僅三四葉幽靜娟妙如有清芬襲人斯真所謂  
春蘭者他人橫披直抹亂葉叢雜花不勝數所畫皆蕙  
耳殊少空谷美人之致

張璞山琢曲阜人家無立錐隻身走遼東取坊閒粗紙  
隨意作畫得數錢餬口無師傳非素習也畫竹畫松筆  
力道勁價漸高轉之京師入雲林閣冒古人得重值久  
之士大夫多知其名畫益貴重蓄妻子援例捐職官四  
川典史各上憲亦重其畫市閒多贖作欺人而璞山之  
名益噪告歸置田宅場揚然列縉紳閒矣嘗見所畫五  
松古幹離奇空中三瀑布飛落氣勢雄偉卓然大方竹

則人多有之

博山趙香海秋谷之族子也畫山水擅名筆力蒼勁氣局宏深如處洪荒之世山石草木迥非人境偶寫水則波濤迴旋激宕似有雷霆之聲於詩品中可云積健爲雄世閒觀畫者多喜細潤此派遂少賞識子雖山水變而蒼潤蔚蔚多墨少筆趙氏自清止秋谷兩先生後多習詩畫漸染餘風其族某游金焦兩山歸而繪爲橫幅風帆往來大江中兩點青螺一高秀一橫臥欽寄吾嘗謂南方江中有金焦吾東陸地有鵲華可稱魯衛鄭柳田歷城人忘其名幼貧無恆業買市中觀音像臨

摹鬻以自給張雪鴻見之喜其筆意越俗招之學畫遂以畫名山水蒼鬱兼工白描人物晚年聲價益重嘗見其鑄錯圖引筆如鐵線一偉丈夫執錯審顧英氣勃勃爲高子固白描寫照取其意不取形似也又爲高杏江寫乞兒執瓢兀立衣服藍縷而意態傑傲則老筆縱橫矣其子號小癡亦工畫而氣韻生動不逮乃父

高密李君忘其名號善畫石嘗見巨幅一石突立盤折四五層重疊而薄皆平頂張雪鴻畫石橫臥穿穴玲瓏以筆墨淺深分凹凸向背偃蹇轉側有奇趣畫石者尙峭拔喜磊落要皆恆徑二君於人著筆易俗處獨開生

面愈見名士風流

婁鳳翥亦畫花卉人物漸染雪鴻餘習顧中郎曠代逸才貌之者未脫虎賁之氣吾淄王君宿森嘗得舊屏畫宋金會盟故事山林樹木人物叢雜人高尺許皆環甲旌旆飛揚南來者氣度雍容北國士馬雄壯著色揮毫老氣無敵非今人筆墨惜缺一幅倩婁補之其甲士旗角掩面樹葉遮馬觀者謂以掩映取致不知其腕力靡弱不敢露全身也張雪鴻畫十八應真雖不及龍眠之工細而衣紋如篆自具古致以婁較之才質學問分上下牀矣鳳翥歷城人

歷城有韓姓者不知其名從趙小田希格學畫牡丹小田南人遊齊魯以畫爲業常畫牡丹百幅盡態極妍裝成巨冊韓雖未及已超然異於俗工之多買臙脂矣家貧好飲囊有百錢求畫必不應伺其窘餽以美醞則欣然提筆家人告米盡不得已以畫易之市兒售之速得以獲利近聞歷城多工畫者遠遊未見亦未悉姓字焉故不具錄

杜少陵咏畫松云白摧朽骨龍虎死黑入太陰雷雨垂妙于形容後人慕之潑墨淋漓不知奇偉在骨不以濃濁勝也泰安趙仁圃相國之幼子爲學博專門畫松不

師古人而銅幹鐵柯筆力千鈞吾淄畢氏有畫松者余見時年已老矣畫松成林趙以醜拙得蒼古畢取氣格老橫而筆墨秀勁可謂異曲同工

畢名海模或謨字記未確

歷下楊徵和致祺兄弟三人有三才子之目徵和善書能文隨筆畫蘭不數作也好絲竹酒間花下清歌悠揚賓客樂與酬酢次善雕刻圖章工揭裱家藏書畫多手自裝潢非俗工可及其季弟畫美人絕佳畫扇一柄值四金而不輕落筆求之經年或竝扇亡去不汲汲于利也家極貧入其室圖書鼎彝位置都雅有若素封一堂怡怡蕭然有以自樂

吾邑畢海生畫山水秀潤亦未名家見所臨吳道子關  
侯像迴與眾殊像爲騎馬馬昂首迎面而來風鬃霧鬣  
蓬蓬勃勃侯端坐提刀神威凜然祇露半身乃知古人  
布置自別惜未見吳之真迹爲何如也濟南北極廟後  
壁舊傳真武像爲吳道子筆俗工塲而新之真迹自此  
湮矣

列仙傳曰鹿皮公者淄川人也少爲府小吏才巧舉手  
成器岑山上有神象人不能到小吏白府君請木工斤  
斧三十人作轉輪造縣閣意思橫生數十日梯道成上  
其巔作祠屋畱止其旁其二閒以自固食芝草飲神泉



七十餘年淄水來山下呼宗族得六十餘人命上山半  
水出盡漂一郡沒者萬計小吏辭遣家室令下山著鹿  
皮衣升閣而去後百餘年下賣藥齊市也其水西北流  
注淄水淄水又北出山謂之萊蕪口東北流者也按隋  
始設淄川此事載水經注北魏時何以先有淄川之名  
且其水西北注淄水淄水在吾邑東而萊蕪在上流其  
非吾邑明甚然吾淄前所轄甚寬西北長山新城東南  
及萊蕪多屬淄未可以今之方域限之也邑乘亦載其  
事固未可刪

荆先生無名不知何許人客濟寧人有持白團扇撲蠅

爲血所漬因繪爲紅葉題詩云新霜楓葉醉殷紅記得  
題詩出後宮繞遍御溝尋不見被風吹入月輪中人遂  
目之爲荆紅葉

雪蓑道人蘇洲

河南  
沈縣

嘗遊巴中嘉隆閒遊歷下往來淄

川益都人以爲仙詩文奇妙無塵俗語嘗自作聯曰雪  
裏披蓑寒動一天星斗雲閒補衲暖回大地陽春善作  
大字龍蛇飛舞龍洞大殿前有蓑雪碑記作狂草署名  
曰五湖散人兼三十六洞天牧鶴使者衡王誕日於南  
山石壁大書壽字刻之中閒橫畫可以臥人石壁絕高  
不知當日何以運筆能譜一絃琴亦孤調也吾淄張相

國家多學其書法蜿蜒攫拏倉卒使人莫辨其字

有道人居德州衛河西鄙之琵琶屯生於明嘉靖三十年辛亥年一百二十歲屈指三見辛亥矣起居如平時五官之用未嘗少衰然非有服食修養之術也聞其少時事母最孝家貧不能娶妻入九子祠爲香火道人祠有薄田數畝躬耕給朝夕而已與人一無所忤而意興蕭然殊不類荒村僮父高念東太史以使事過州便道訪之爲之徘徊不能去焉程先貞爲作詩云道人一百二十歲瘦骨岐嶇鬢髮蒼坐對白鷗浮水靜行牽黃犢種田忙頗聞愛日依慈母直數生年到肅皇陵谷遷移

深閉戶烟霞廓落獨登牀空心不用看書卷渴叻何曾  
問酒漿業做逍遙遊廣莫身餘渾沌屬中央頑仙縱未  
膺真誥庶老還須入下庠卻笑蜉蝣空復在謁來楚楚  
炫衣裳

沂水巴山有石洞乾隆閒忽有道人跌坐其中樵者疑  
爲丐欲逐之不爲動招集村民十餘人以巨絙繫其腰  
齊力牽曳道人屹然如故繩斷乃止驚相告語目爲妖  
諸生數輩造祠問訊亦不答但以手畫地作借居二字  
或吟詩以贈道人依韻酬之問以休咎不言數月移居  
濟南嶽祠沂水生應試有識之者往訪已飄然去傳其

二詩云一聲猿鶴響松關坐冷孤雲意獨閒有迹已教  
同世外無心何必去人閒松陰碁局空殘劫爐底雌雄  
見大還流水桃花杳然在一迴頭隔萬重山天地悠悠  
一片雲何心重與結聲聞迷離紅翠花三樹町疇高低  
鹿一羣自是清空通沆瀣不將搖落歎河汾虛無枉把  
靈臺鑿混沌由來總不分

歷城北極廟來一道士號醉琴南人也以諸生出家住  
此彈琴圍棋唱崑曲亦好作詩初至延賓一日會詩一  
日會琴圍棋歌曲皆分日而集一時士大夫多與往還  
張船山贈以聯有跋仍隨手改竄倩江南汪姓者爲作

東郭墀間圖一名若此圖寓諷世意高自位置以風流  
自命齊河郝答爲題詩云誰向鷺溪爲寫真幻中形影  
畫中身紅閨夜夜相思夢不道塵間有乞人黃庭一卷  
証前修訕泣寧遺妻妾羞若把浮雲較蹤跡不堪回首  
古揚州

王照園字婉侻山東福山人主事郝懿行室懿行字蘭  
皋嘉慶己未進士有才名婉侻書仿歐柳工古文得六  
朝人筆意尤精漢學日與懿行考訂經史疏爾雅箋山  
海經名噪都下有列女傳補註八卷敘錄一卷列仙傳  
校正一卷敘讚一卷夢書一卷阮芸臺先生之母林太

夫人性耽墳典繪有石室藏書小照獨坐石上芸臺先生執書侍立婉佺題詩有云齋名積古從公定室有藏書是母畱芸臺先生績古齋後改名積古故云齊河女史郝秋岩寄以詩小序云嫂棲霞族兄懿行室也兄以著述馳聲天下嫂亦文章博洽名能與兄偶學者稱爲婉佺先生甲戌冬嫂自京師以所註夢書列女傳見寄賦此誌謝文星夜朗銀河北賢媛聲華溢京國續史無慚世叔妻生花肯讓江郎筆憐爾文章播上清蛾眉不愧號先生遙遙願識瓊枝色春夢無因到鳳城

趙琳字石寅掖縣諸生遊吳間有王竹素者字寄磊能

詩喜與名人唱酬所居樓題聯深自負聞石寅善琴工  
詩大會賓客索題詩竹素生於七月八日諸客詩無當  
意獨石寅詩有句云巧讓天孫方一夜明當玉兔漸圓  
時竹素大驚賞遂委身焉既歸大婦不能容漸至憔悴  
病卒石寅哭之作詩三十首有佳人誰絕世知己卽傾  
城嘗見一書載其事甚詳竝記其樓上楹聯今不記矣  
竹素詩多散失寄石寅夫子云夜夜梅花夢裏香半春  
清瘦倚迴廊前期總驗著占好屈指流光亦斷腸佛龕  
香篆誓如初茹素恆甘嫩甲蔬烽火隔江魚鴈少淚痕  
濡墨答君書杜鵑啼歇又倉庚逝水年光暗裏驚幾度



青春拋擲去真成薄命負今生孤燈低焰晚風輕淅淅  
虛窗雨二更此際有心同葉碎小芭蕉上一聲聲此蓋  
石寅外出竹素病中所寄之詞也石寅受制于婦而不  
能救徒悲奚益乎

盧雅雨先生重刊金石錄敘謂李易安作金石錄跋時  
年已五十有二必無更嫁之事殆造謗如碧雲駮之類  
宛平女史黃友琴喜易安數百年覆盆昭雪賦詩云李  
氏本清門趙亦天族裔淹通敵儒冠文采茂儕類詎踰  
就木年而違泛舟誓金爲口所鑠葵竟足不衛卓哉都  
轉公一語抉蒙翳披雲始見天瀚雪洵快事詞憐漱玉

新圖愛打馬慧曠代有知己九原當破涕拔易安不再  
嫁前人已辨之觀此詩益知盧公高識非私於鄉人也  
黃氏爲劉公師陸繼室著有南濱偶存劉公字子敬精  
金石之學現任直隸霸昌道今年七月自蜀赴任

丁氏諸城鍾大文室嫁數月夫卒姑以痛子故致疾氏  
侍湯藥惟謹姑愈氏曰可以畢吾志矣乘閒飲鹽鹵家  
人解之得不死氏志甚不食十四日死斂時於衣笥中  
得詩蓋別父母者也詩云夫死難獨生兒將歸黃土父  
母鞠育恩請俟來生補時道光壬午脰廿四日也同時  
有日照舉人丁佩蒼女亦以夫死殉節人謂之雙丁洵

足媲美

諸城侍郎王公瑋慶長身玉立氣度甚偉京師相見時  
方爲巡街御史未幾官九列遽卒可惜也娶高密單氏  
通判可玉女能詩月夜病中偶成云拚將瘦骨寒得此  
倦眸豁不知更有身表裏洞冰雪侍郎兄弟競爽卓卓  
有聲轉瞬華屋邱山家亦陵替

乙意蘭汀南伎也或以爲厯城人非而終老厯城初袁  
玉堂潔以重金購之官山東時攜來意蘭通文墨玉堂  
以事戍塞外欲從行其母不忍離乃製駢體文以陳情  
策蹇追玉堂至隴西及之例不許出關寄畱關內三載

以待玉堂賜環同歸歷下有友人馬子琴主其寓以詩  
與玉堂唱和未幾玉堂卒宦囊蕭然余來川後未聞意  
蘭何似玉堂善畫葡萄著有蠡莊詩話蜀道旅邸中有  
題詩歛落蠡莊者玉堂未嘗至蜀必他人也

秋岩名鹽齊河人郝鏡亭之女少穎悟學詩於宋湘皋  
及叔寅亭閨中著有碧梧吟稿嫁後有蘊閣詩鈔孀居  
有恤緯吟海鹽貞女行輓郁太孺人并孺人郁氏浙江  
海鹽名家女字同邑王氏王亦貴族而家綦貧未婚夫  
亡誓不醮乃以處子稱未亡人焉爲夫立嗣自撫教之  
旣而子以贊府宦江右誤掛時網謫居吾郡之章邱邑

孺人從而家焉居數年嗣子卒惟二孫以硯田爲養蔬  
食水飲泊如也嘉慶戊寅長孫某以孝廉仕在平學博  
方擬迎養而孺人歿年七十有九葬章邑之女郎山山  
名豫爲之識嗚呼異矣詩云穀則異室死則同穴若太  
孺人之與王贈君也一言爲定百折不移而生無一面  
死隔天涯斯亦可哀極矣余有表戚在章邑近以王先  
生之門人某所作郁太孺人輓詩見示余讀而悲之因  
爲賦此篇云海鹽古邑海雲邊載生女士貞且賢那省  
雄龍會雌鳳却教寡鵠憶離鸞離鸞寡鵠真堪痛女子  
由來一諾重初心已許奉光儀竇瑟忍教成別弄竇瑟

絃摧已斷腸若敖魂餒更堪傷若敖藉力縣瓜甍漆室  
依然是女郎冰心玉質古希有尸饗不惜織織手幸得  
維城克象賢栽花上國遠將母故鄉雲樹渺天涯門鎖  
春風閒落花宦海風波那可料一帆北海又移家虞翻  
獲罪曷敢怨阿母甘心共患難何期天府召修文遽使  
高堂闕視膳景壓桑榆日漸曛敬姜哭子詎堪聞共歎  
敬姜失令子還欣李密是賢孫賢孫捧硯淚沾袂幾載  
硯耕新得歲青氈方擬慰重慈白髮胡爲戚永逝吁嗟  
乎雲旒霓旌去不還徽音懿德自人間百歲終全女子  
節一杯獨葬女郎山女郎之山在何許山頭夜夜驚風

雨生不同衾死異穴杜鵑啼血如人語寄贈章邱馬小  
姊并序馬小姊者新城王太守公子之配章邱馬幼文先  
生之女公子也先生之尊人濟川先生昔嘗設帳郝氏  
授經於先兄乾隆末年幼文先生復館於寒家余弟從  
受業余亦微聞餘論有所淑艾焉今先生以池州太守  
丁太公憂守制居私第有愛女年二十餘耽文藝善畫  
折枝余聞而慕之恃世誼遂漫有此寄淑慎名家子幽  
閒貴室嬪文章鮑小妹書法衛夫人餘慧丹青寄芳枝  
點綴新趨庭傳異學染翰樂天倫絳帳追前武烏衣屈  
上賓由來孔李誼不亞謝王親况是閨中秀堪稱席上

珍瓊瑤擬顏色冰雪想丰神投李曾非遠班荆未有因  
詩鳴吾豈敢畫好子應真霄漢瞻高鳳泥塗愧弱鱗願  
將五色筆爲布草堂春歷下韓氏雙孝女詩并序孝女家  
歷城姓韓氏一名奇一名貞同母姊妹也父有三男俱  
夭歿二女誓志不字夙夜服勤以供甘旨父母安焉父  
卒殯葬如禮其一亦夭其一侍母如初母亡獨居墓側  
祭掃不輟年六十猶處子也里人異之爲作啓徵詩余  
敬賦長律得十六韻濟水迴澄練華峰聳碧蓮山川鍾  
秀地閨閣異人賢懿性生偏厚高蹤世競傳靈香爲姊  
妹曾閔是嬋娟蘭桂萎朝露椿萱憂暮年永懷烏鳥意



不詠鵲巢篇織手調薌鼎鳴梭易酒錢旨甘廚下具粉  
黛鏡中副草色循咳媚花枝照砌妍冰心同皎皎彩袖  
兩翩翩喬木經霜隕麻衣擬雪鮮二難終葬父一美倏  
登仙窈窕身孤在伶仃志益堅女兮焉讓子母也故爲  
天力竭酬春煦魂銷哭逝川墓門凡幾載素髮颯垂肩  
郁氏王丹林名桂之祖母馬氏  
王漢南太守名允楚之子婦

方壽字蓬客號芝仙山東歷城人布政使昂女兄諸生  
潘可宗室著有芝仙小草芝仙工花卉超逸有天趣性  
耿介弟官江南寄以吳綾一端答書云吾家耕可以食  
織可以衣弟爲廉吏此等物不須也弟服謝之雪霽云

快雪初晴月滿庭清光無際透疎櫺香生簷蔔心如水

閒展黃庭一卷經

方伯讀書吾涵與先王父交善  
歿後遷居于涵今不知所之

許瓊鶴芝仙山東濟寧州人諸生許夔臣姪女燈花云  
靜夜垂簾坐鏡花豔小窗穠華輝繡帙春色上蘭缸結  
蕊環聯九連枝鏡映雙爲誰占喜事坐待曉鐘撞按夔  
臣字山雁以詩名曾輯女史詩爲雕華集待梓翁繡君  
女史以寄他氏增損刻之別立集名夔臣抑抑病歿文  
人好名之弊如此

新城張亦宣室高氏閒居偶成云秋成收罷樂閒居每  
歲倉箱幸有餘漫道閨中無大計積錢多買課兒書觀

詩知其有識

新城張廷敘室于氏新城人夢題萬峰山云一桁青山  
倒碧波空中去住白雲多靈槎未許漁人泛惟我曾經  
夢裏過

袁玉堂買乙意蘭爲小妻價不足賒一半候居官時全  
完其母隨之山東及玉堂罷官仍未償也前記意蘭追  
玉堂至關未記其詩忽於故書中檢得一紙乃其詩也  
蓋馬子琴錄以寄余者急爲存之自製剪綵雙鷄贈主  
人附以詩云何妨雌伏忽雄飛裁剪雙鷄寓意微有志  
四方男子事要郎早日策征駢

係春詞者郝答餐霞氏爲趙文鷲賦也文鷲小字春娘  
濟之清邑人年十七來歷下色藝冠一時呂性豪爽無  
脂粉習得諸名士歡愛呂郭子所謂却嫌脂粉污顏色  
不把風流奪綺羅也戊辰夏五妓呂所志不遂遽自殞  
葬雙泉山下餐霞爲詩弔之彈指匆匆過曇花現偶然  
大千原是夢小劫總非禪遠捨迷香洞偏登切利天夜  
臺畱泡影錦瑟感華年漫說金爲屋真驚玉化烟三生  
空有約一面更無緣憶昔爭春宴常裁送別箋歡娛方  
欲罄幽忽忽相連後會知難矣前期真杳焉青衫愁污  
酒綠綺罷調絃時濺看花淚虛營買笑錢殘紅成亂墮

遺翠竟誰憐  
唯擬東東喚  
尙如有有牽  
死情卿不愧  
緘恨我寧捐  
爲假柔毫力  
思將薄倖傳  
長吟黯相弔  
一賦慘春篇

贈姚姬阿翠用王次回體  
姬名翠鈴少隨其祖母育孫  
氏嘗爲郝氏佃客後乃復姓  
詩云眉痕減翠首飛蓬應  
惜晨妝臨鏡慵  
妮客偶然調白老喚娘且與煮黃封  
彊銀不爲彈箏卸腕玉  
新綠病酒鬆箇是關心  
桃葉姊暫時清話可從容  
憶昔齊眉剪髮初  
玉人居處近蓬廬  
牽蘿偶逐漂衣母  
挑菜偏隨鬥鴨姑  
曾是簸錢年紀小  
那知校瑟姓名殊  
七年明燭燒鐙夜  
可記當時懊惱無

漁洋喜杜少陵句細雨荷鋤立哀猿吟翠屏喜高念東  
先生句筇杖古松流水外蒲團修竹絮風間皆欲繪以  
爲圖未果有秋林讀書圖又倩門生爲繪種竹圖二圖  
尙存劉寄菴宰新城題其讀書圖云少年才子老儒臣  
玉佩瓊琚近紫宸識是蕭齋紅葉下秋山影裏讀書人  
論詩妙在酸醜外作畫難傳阿堵閒最好文郎解神韻  
疎林落葉寫秋山題種竹圖云長松百尺覆茅廬中有  
山人坐讀書忽憶渭濱千畝竹分來夜雨曉風初玉筍  
門生卽畫師更添一絕是新詩山中正解新篁籜誰記  
劉郎手種時又有清溪詩思圖吾淄張厯友爲題長句

不具錄

漁洋詩筒蓋與徐東癡以詩往來漁洋題字刻其上亦韻事也至今猶在胡乙垣見之述于劉寄菴慕而賦之胡生早歲耽吟詩阮翁恨不生同時鬣尾烟深石帆雨夢中往往如見之翁昔言語妙天下半世傾心是徐夜落筆齊將翡翠裝停毫爭把珊瑚架徐君小隱無宦情有時畏入高苑城咫尺相思不命駕惟憑青鳥通姓名阮翁乃截淇園竹清韻琅琅媚幽谷寸心自訂金石盟尺素如遺鯉魚腹上鐫私印徐與王王家復有書數行司馬橋頭小逕滑村人乍見譏癡狂不讀詩卷可干載

一尺之簡至今在李囊薛瓢同消沉此物不朽將有待  
落君家手何曾難借人醉後輕相看海嶽故事君知否  
蟾蜍淚滴珠闌干

吾邑高念東先生有文徵明畫寒山飛雪圖國初諸老  
題詩甚多畫短而題跋盈二丈餘爲一長卷諸家各體  
皆備筆力馳騁漁洋山人自書絕句字體欹斜詩載精  
華錄中未覺出色與諸作對觀則洒然出塵別具風神  
方服其詩之妙也詩云驢影凌兢冬氣昏危亭孤棧簇  
烟村披圖正有溪山夢風竹蕭蕭雪擁門

明一統志云三歸臺在東平州東阿縣西二里第今東



阿邑卽古阿邑臨淄去阿遠管仲豈築臺於遠地春秋  
時阿乃衛邑後齊威王烹阿大夫乃衛亡之後其說誣  
不足信也昌樂大路旁有山名孤山石碑立於旁大書  
伯夷待清處同一妄也新城有桓臺謂桓公所築劉寄  
菴月夜登桓臺高處詩云春雪未消月未落乘夜高矚  
興不惡山川幻滅烟靄空如駕方舟向海若西南極目  
長白峰萬丈寒光得大略青霄倏忽來片雲疑有仙人  
跨黃鶴遙聞唾咳珠玉生金石歌聲競相作蠶尾山房  
石帆亭前輩風流宛如昨平生亦識名勝遊洞壑林巒  
健雙腳雜然坐我塵囂中今夕幾同僮僕諾天鷄鳴爾

無先鳴好待城頭罷宵柝

聞韶臺在濟陽子在齊聞韶處按家語夫子見童子視端行直曰車驅之車驅之韶樂在齊矣夫子知高氏肄韶樂遂爲高氏家臣得以聞韶則聞韶當在臨淄濟陽去齊都二百餘里何以在此聞之且臺在曠野四面陡立不在高氏之家而在此無從考證向有奉祀生二人蓋立廟其上也

魯連臺在聊城東高七丈卽仲連射書與燕將處見水經注至新城有魯連陂高苑有仲連墓相傳雖久無確據也而在平則墓與祠皆在焉縣在秦爲聊城地漢始

置在平縣唐併入聊城金時劉豫復分置至今相沿核  
其實仍聊城地耳縣東北三十里有仲連村明學使陸  
公錢葺山東通志謂魯連村後改王樓店舊有祠神州  
古史考謂之望魯店以音譌也縣志謂墓久平康熙二  
年知縣王畫一築其墓且勒石乾隆間濮州潘牧如誠  
過祠下賦詩縣令某葺其祠北二里爲墓復修之德州  
馮大木廷樞有詩云落日聊攝東訪古仲連臺廣野絕  
人迹大風海上來北望易水流西顧函關開當年倜儻  
生卓絕濟代才抗論恥帝秦意氣凌八垓投策過齊城  
飛書燕將哀功成不受賞飄然歸蓬萊我來尋遺迹爰

茲澹蕩懷翩翩鴻鵠舉逸翮挾風雷海水終古淥斯人  
安在哉空餘廢墟在野草生枯芟田山薑先生弟需在  
平道中云幾日礪礪路經行過濟西青帘丁塊酒白板  
午時雞雲斂秋初變風高鴈不齊魯連村畔柳悵望野  
烟迷漁洋魯仲連陂云七雄既龍鬪陳寶歸嬴秦師出  
函谷關六國咸逡巡邯鄲日夜急咄嗟誰解紛蕩陰師  
既頓新衍謀豈倫先生畫奇策長揖平原君僕妾愧萬  
乘大義明君臣縱橫數千言顧卻虎狼軍功成不受賞  
飄然歸海垠蹈海既高義肆志寧辱身至今齊趙士個  
儻希清塵我來古陂上遺祠蔓荒榛甃道竄蒼鼠天風

吹白蘋緬懷田巴語景行跋千春

青州有社首山故稱青社有稷山山下立館以棲遊士  
故多士談于稷下明衡王封藩于青國初博山孫文定  
公過之記其宮觀馳道花木猶存迨後僅一土邱巍然  
云是望春樓故址安邱安青士篋詩云故宮猶記望春  
樓老樹斜陽土一邱石闕烟迷荒似夢東風花發冷疑  
秋人來果苑思芳草瓜種青門說故侯玉砌金鋪歸劫  
火澗泉千載抱城流昔長安民券某處至花萼樓某處  
至含元殿秋風禾黍自古歎之矣而雪宮故址猶有能  
指其處者賢人遺蹤固應長留天地間耳或云衡王之

孫覿棲吾淄登巒山賦詩云八月瀟瀟暮雨收雲門回  
看古青州三千鐵甲成虛度十二藤牌付水流夢裡常  
居金鳳閣醒來不見玉龍樓王孫事業今何在落落天  
涯嘆白頭未知確否

濟南府東北三十里有平臺城齊景公爲晏子封邑使  
田無宇致臺與無鹽漢安帝延光三年濟南上言鳳凰  
集臺縣毛海客詩云平臺漠漠接寒邱齊相遺封又漢  
侯濟水依然東北去荒城不見鳳凰遊

古有文冢筆冢篆冢厯城東梁家莊有土數堆傳檀道  
濟唱籌量沙處居人謂之糧冢毛海客咏之云糧冢蕭

蕭霧不開江州原是濟時才滑臺陷後軍資絕想見量  
沙覆米來漁洋咏檀道濟戰處云長城自壞復誰尤戰  
地經過憶唱籌野鳥啼春寺門寂可憐猶似白符鳩感  
慨深矣

山東古蹟不勝書略錄數詩以志其概漁洋過荏平咏  
古馬周云火色鳶肩者相逢徧五都不知曾一箇得似  
馬周無張鎬云湖海鬚眉在寧忘社稷讐張公琴酒客  
能辦殺閻丘又咏顏觸墓云末世寡尙志薄俗希乘軒  
豈不貴纁帛形役神不全吾高顏夫子抗節藐齊宣鐘  
簾寧足論殿上呼王前晚食與安步詎以榮利遷監門

良自賤趨士理亦賢俯仰二千載弔古悲荒阡墟墓絕  
樵採清風激頽頽古道邈難作悲哉東逝川轅因里云  
漢初尙黃老儒術闡不章齊魯誕諸儒五經如載陽遐  
哉清河傳卓爲羣倫倡抵掌論湯武大義非荒唐曲學  
誠孫宏微言詒后蒼訓詞列學官星日同琅琅我生睽  
千載桑梓寧異鄉寤寐思哲人流風一何長生慙齊魯  
學私淑附師匡

地志皆以夾谷臺在淄川聖迹所至豈不爲榮第兩國  
會盟芻糧帳幄供頓所聚甲馬雲集必擇寬廣之地而  
吾淄之夾谷車不能進馬不並行何取荒山僻壤立壇



坊焉蓋地有甲山有小平處名之爲臺一石兀立名曰石秀才以爲夫子像更屬荒繆前設有奉祀生二名今廢

淳于髡後裔散居登萊之間馬子琴見其家譜以髡爲始祖漁洋詩云玉釵掛臣冠滅燭聞薊澤此際獨留髡僕亦堪一石齊河郝敬亭咏綿駒故里云狂歌憶綿駒古城秋草廣天晴雲亂飛林靜鳥長往薄日銜遙山猶聞發樵響今高唐非齊之高唐高唐在今禹城

陽穀城西北三里有項王冢半毀壞石碣尚存題云項王之墓水經注記之其碑古矣史記魯爲楚守漢示羽

首魯乃降遂以魯公禮葬羽於穀城或云王歿後有李將軍者守鑿山不下高帝使人說之請以王禮葬王既葬將軍自到墓畔有小墳卽李將軍也碣書項王此其故歟此說可補史傳之缺河南解元李卿穀過其地有詩云亞父之謀如能用楚室得天亦正統隆準帝王自有真蓋世英雄空如夢秦關百二誰能當忽驅虎豹如驅羊一夫橫掃豈能濟前有陳涉後項王天心終屬赤帝子斬蛇一劍興碣鴻門談笑何揮霍當時曾共入關約始知黃石老譎謀已有勝算爭先著淮陰餓夫能將兵奇師四出傾連營江東子弟飄零盡帳下美人太

息生重圍無計策。騅馬頸血一濺長虹化。何人馬革裹尸還。誓守鐔山不肯下。無計賺漢且歸降。降我無如先葬王孤臣。報主今已足。從容赴節何堂堂。吁嗟乎鳥已盡。兔已死。漢代功臣長已矣。地下項王含笑看高墳。長伴將軍李。

陽穀卽漢之穀城黃石公。期張良于此有墓。有祠。誰把一卷書。橋頭贈孺子。既有命世才。胡不乘時起。假手成功名。畱身亦何俟。毋乃漢陰流機心。動還止不然。納履餘帝師。深自恥我來。千載下未悉。授編旨徘徊古祠旁。惟覺松風美。此郝允秀謁祠詩也。山名陽穀山產文石

閔公鶚元字少儀德清人乾隆初年進士視學山東院

門左右建兩坊一曰鄒魯教諭一曰海岱文章署中舊

有八景四照晴嵐

四照樓高聳上層四面開窗盡見諸山

鐘樓霽雪

藩署鼓樓

此署後鐘樓皆兩層極高大不知所由

外有海棠春雨瑤除石芝盧勗談

經平橋待月紅欄活水署有流水潛出院外成溪西轅

門外蒲葦森森漁舟三五繫纜岸上人家似江鄉村落

諸景多咏之者長篇短句美不勝收惜忘一景有新增

者曰瑞筮書屋不知所云亦未有詩道光壬午余謁何

仙槎先生於署所見景僅得二三未全覩也閔公按試

登州中秋夜和吳玩春韻云乘槎直到海天東秋意蕭

騷興不窮萬里相看明月夜三山半落酒杯中魚龍寂  
寞波濤閣樓閣清寒嘯咏同最有吳剛工斫桂香風飄  
拂滿簾籠

翁覃溪先生方剛大興人視學山東興起古學以不合  
時宜卒罷去先生績學多聞所作兩漢金石記剖析毫  
芒精經學多所發明詩宗江西派嘗手批漁洋詩集工  
書初學顏繼學歐隸法史晨韓勅諸碑濟南明湖上巨  
碑是其所書新城王秋水見於京師年七十餘面如桃  
花余有黃瘦瓢畫松二株先生題古風其上云蒼龍僵  
立老坡語瘖脊盤空自何許飛裂奔湍怒有聲猶挾巖

巒勢呼舞虛無根有鬼神會浩浩雲氣迴太古畫師欲  
寫捧雲勢虛白光中自撐拄不點蒼苔氣逾厚倒拔石  
骨青初吐舉似嶽崎磊落人誰歎巖壑冰霜侶昔倚湘  
中巖更壁今挂海上詩人戶和君長嘯作鸞鳳助君筆  
力如牛弩大勞山居歸有日且伴行旒向陸汝爲君一  
斗瀉墨濁掣起飢蛟作雷雨

近稱古文能手姚姬傳先生飛最著名來遊吾東適朱  
子穎孝純守泰安兩人交善相約登岱歷石磴七千餘  
級古者登山循東谷東谷古謂天門溪水今皆循西谷  
其險峻處亦謂天門與子穎坐日觀亭風揚積雪撲面

子穎太守卽築晴雪樓者前在四川隨征金川及宦山  
左遇王倫之變先見大府陳方畧親戰臨清城下巨炮  
火丸從頭上飛過手挽弓矢射斃賊首智勇兼擅平日  
風流自賞好與騷人唱和名士也姬傳先生云泰山之  
陽汶水西流泰山之陰濟水東流陽谷皆入汶陰谷皆  
入濟其爲東國重鎮以此

吳江陸公朗夫燿貌清癯廉潔自厲王倫之變公在濟  
寧嚴守禦賊不敢犯官布政以巡撫貪暴不相能告歸  
後爲湖南巡撫以勞卒其友徐貞生入視合斂室中別  
無長物歎曰貧至此卽不死亦難度日矣子文駟落魄

無依趙耘菘感而賦詩云廉吏可爲兒作客故人已死  
鬼成神湖南人皆以公爲湖南省都城隍故云按陸公  
爲山東布政時巡撫名國泰爲御史參劾伏法惜公在  
官不得展其志公十三歲賦牡丹詩得名紀其偶感一  
首足見生平喜無側媚干時術不作媵阿諛墓文知己  
未妨當代少浮名惟恐後人聞硯池餘墨臨窻試初地  
清香灌手薰決計疎狂竊微祿閉門寂寂似揚雲

前撫院鐵冶亭保嘉慶年間在吾東諭諸生一時門生  
有七省學院九省主考雖屬鼓舞士子意在誇詡及門  
之盛要爲藝林佳話公與弟聞峯皆有詩名有風雨對



牀圖多題之者嘗輯熙朝雅頌集一百二十卷皆滿洲  
人足爲我朝掌故素工書濟南趵突泉上呂仙祠匾額  
燧元贊運四大字是其筆迹論者以劉中堂石菴翁鴻  
臚覃溪與公書法爲鼎足過在平云路入重邱境肩輿  
叩縣門地延孟子館人近魯連村樸俗衣冠陋荒城烏  
雀繁礪礪成賸迹古月澹黃昏又滕縣謁文公廟云齊  
楚縱橫鼎屢遷彈丸百里祚孤延不須更問維新術已  
共成周八百年意極翻新以五十里稱百里或者舉成  
數可不拘耶

曲阜顏衡齋藏犀杯銘辭云文羊一角其理沈黜不惜

剖心寧辭碎首黃流在中爲君子壽按萬歷五年十月十七日吳公中行疏劾張居正奪情次日趙公用賢疏上皆被廷杖許文穆公爲行人刻玉盃贈吳以犀觥刻是銘贈趙其後流轉頗易主乃爲顏君所得山東學使翁覃溪以書告趙文毅五世孫者庭者庭將以玉盃易之乞覃溪爲文並求諸名士作詩以爲介紹杯遂復歸趙氏趙雲松詩云杖瘡忍疼祖宗烈捲澤興懷子孫孝此意應蒙觥主憐會見完璧速歸趙事隔二百餘年乃爲吾東留一故實

趙懷玉字未辛江蘇武進人乾隆四十五年召試舉人

官中書出爲青州府同知在都與吳穀人蔣心餘張船  
山諸人倡和詩名甚盛船山贈以詩云舍人風格本飛  
揚潦倒新看髯有霜老不登科文愈古貧尤多病酒難  
狂眼中傀儡眞兒戲夢裏升沉易夕陽撲筆推書同一  
笑年來我亦悔名場送其之青州司馬任云臨歧相對  
感清門廉吏同留五代孫勲業何年承世澤文章無處  
答 君恩塵中幻境看雲影衣上間愁驗酒痕惆悵東  
橋輕話別一重楊柳一銷魂按廉吏五代孫句似上溯  
文端公鵬翮恭毅公申喬未卒出都留別諸故人云去  
住真知兩不堪且尋鄉夢返江潭下車事已同馮婦縮

屋心誰信魯男聽到悲歌先自淚傾殘薄酒未成酣故  
人知我緣親在寄語夷吾漫諱貪三日風光歲又新平  
生未識帝城春空羣冀北難爲馬捷徑終南况有人彩  
筆久疎江令夢素衣空惹庾郎塵竈前檢點更炊具合  
是勞薪作後塵玩詩意甚牢騷

新城阮亭先生西陂別墅有石帆亭樵唱軒半偈閣大  
椿軒雙松書塢小華子岡小善卷洞春草池三峯嘯臺  
石丈竹徑綠蘿書屋一時名人題咏共九十餘人公子  
啟涑彙而刻之此書不見漁洋全書王初侗過新城訪  
西陂別墅詩云尙書池北營書庫數十年間付杳冥曉

日鷄豚孱提閣秋風禾黍石帆亭居人指點基空在故  
老傳聞事忍聽却憶銅坑銅井外漁洋終古一峰青侗  
初嘉善監生官山左有海石集

魯城東七里有二石人皆西向一鐫樂安太守庶君一  
鐫府門皆在紳下盛秦川百二作詩云辭漢金人淚暗  
滴何處摩挲歎銅狄歸然不見魯靈光一例西風吹瓦  
礫石人乃得全天年偶立千秋古道邊樂安太守爾誰  
是姓氏猶在名無傳古道離離遍禾黍但向斜陽日延  
佇千呼萬喚不肖回忍覩蓬萊變塵土日暄雨洗換年  
光碧蘚紅蘿作繡裳紙錢飛散白蝴蝶寒食何人澆酒

漿斲冰詞客好事者獨往驅車弔原野古隸龍文揚寄  
來翠墨寒濤我心寫宇文石鼓等兒孫苦縣光和是弟  
昆遙知月冷清霜夜石人相對語精魂

盛君去淄川後作

黃公左田越兩典山東鄉試後督學詩賦經古而外諸  
生工篆籀善畫者亦許面試公究心字學又工畫故也  
未久內召去甲子闈中與房考諸公唱和劉寄菴作七  
古長篇江字韻公再疊前韻以酬劉亦疊韻再答公又  
作畫兼贈詩寄菴用原韻以和旗鼓相當一時誇爲盛  
事焉初來官宮贊後以尙書予告歸里

張南崧先生鵬展主山東嘉慶庚午鄉試留督學政當

時制藝競尙尤王一派概不收錄所取文清而不薄刻而不纖復見先正風規是能力挽頽瀾者復留心風雅續選山左詩鈔委一學博任其事某素奉賈浪仙爲佛派雖正而境甚窄刻成或議其後然搜羅之富不減於前且有國初人前鈔未及收至此復錄先生之爲功吾鄉非淺也吾家選入是集者先大父而外尙有六人惜未攜來詩皆不記憶

雲南李馥齋文耕初爲鄒平令爲政平易百姓愛戴中丞陳竝帆琦侯皆疏薦超拔由縣令歷陞至巡撫刻朱子語類方靈臯古文外集陳榕門從政遺規呂新吾呻

吟語三魚堂學規於所立書院少與同里曹君鶴鳴同  
學及同宦山左曹爲蒲台令公已官臬司曹以書信往  
來皆手書草字飛舞不拘俗套古人交誼於茲復見公  
楷書似雜漢隸古趣盎然爲令時茶館旅店每張於壁  
益公誕辰襍禳之夫雲集登堂相與如家人有求無不  
樂爲揮翰

吾涵典史胡君忘其名號其尊人爲方靈臯先生之甥  
求先生書聯爲書二句云畧似人形尙存夜氣不知者  
以爲菲薄先生素誠篤無慢語況於其甥乎此正切實  
勉厲意也胡君雅好吟咏嘗以詩集介先王父求周書



昌先生點定記其重九遊疊山句云白雲澗裏尋荒碣  
黃葉村邊送晚鴻手錄詩與王父小山公四叔祖輝吉  
公唱和甚多今不能記

益都沈八忘其名南遊浙江吳文溥贈以詩云自言年  
少時頭角亦頗奇彈碁與擊劍游戲無不爲雲門山中  
有老屋穆陵關前春草綠千年猛虎射殺之徒手向前  
拔金鏃朝馳燕馬問盧龍夜脫吳鈞舞鴿鴒美人如花  
客如玉往往哀絲兼豪竹分金呼管鮑作賦邀鄒枚聞  
道秦皇古碑在興酣獨上瑯琊臺當時搔首隘八荒未  
肯埋沒隨蒿萊其意氣豪邁可想

諸城劉文清公嘉慶十年薨于位 諭賜祭葬 賜物

便蕃將抵里門每物一人捧盤懸 諭賜牌夾道而馳

內有紅絨結頂冠蓋當時之特蒙 殊恩如是開奠日

有人耳目手足皆有殘疾見者謂之十不全入祭痛哭

口呼忠臣問其姓字自稱明良縣中素無其人哭畢趨

出莫知所往人以爲異作詩紀之云忽有明良一廢人

盤香祭幃哭忠臣惜忘其全公任冢宰信芳先生綽有

家風道光元年薨謚文恭 上諭追獎其遇事敢言

賜次子華海舉人乙未大挑與辛巳科同班背誦歷履

肅親王及大臣再三慰諭挑一等以知縣用 朝廷眷

顧世臣恩遇隆重非徒一家之榮也

濱州杜石樵先生以侍郎予告先生兄弟八人一生遭際無絲毫坎壈封翁嘗對客謂其舉人第一而非解元進士第一而非會元翰林第一而非狀元蓋獻詩賦

欽賜舉人居首會試覆試一等第一翰林院庶吉士散館爲館元也子書農受田現爲工部尚書癸巳會元幾得鼎甲以傳臚入詞林子翻翰林院侍講祖孫父子一時濟美

王侍御熙甫名寗焯號直菴高密人詩學三李一派著有在山集考功集學靜草嘗與張船山輩唱和卒後劉

寄菴弔以詩云疏入常關天下計詩成時見古人心

五蓮山五峯秀峙原名五朶山後改今名在諸城城南四十里有五蓮山志一卷多載名人題咏寺藏貝葉經梵字人多不識其貝葉以細竹簽貫之產旱晶石條長尺餘圍徑寸或六稜四稜不等皆長條無方圓者剖去粗石瑩徹明透如水晶山多牡丹三月花開溪邊岸畔所在多有北地濱海甚爲難得最勝者松風徑山路透迤兩旁巨松古幹輪囷撐霄蔽日蒼翠落人衣袂道旁清流潺潺每夏日山會遊人憩集飲酒盤桓

高密李星五先生忘其名石桐之族也三李後詩名最

著無鬚貌似羅漢終日靜坐接人不過三五語即瞑目相對不作制藝而最善衡文門弟子取科第者纍纍先生以布衣終四方以詩請質者不絕以故交遊甚多嘗集亡友詩二冊讀之可存文獻

去余家三十里某家有牡丹樹高二丈餘其橫枝粗如碗不知年代幾何也春時花堆如山遊人攜杯酒賞讌者不絕主人慮踐其菜蔬召匠人伐去一方爲之減色又一處山溪曲折夾岸桃李梅杏甚繁孟柳谷孝廉風雅士也花時輒約友與及門諸子攜酒榼往遊主人重其名厚款之旣而聞其勝者踵至主人惡之伐去

長山聳松岩精篆刻年七十二尙能鐫小印君去余家  
不百里嘗見其印譜一卷皆自雕非集古松岩以布衣  
遨遊公卿間尤善紀曉嵐先生謫戍賜環松岩不遠千  
里走京師相視先生喜甚云陽關西出二載餘歸來再  
直承明廬艱難坎坷意氣減閉門漸與交游疎門前剝  
啄者誰子昂藏老鶴清而癯故人忽自天半落踉蹌躡  
屐遙相呼憶昔把酒談篆刻布衣之舊晨昏俱題云松  
岩老友遠來省余偶出印譜索題感賦長句先生一善  
不沒傾倒故人如此紀之因以見松岩生平也

城武古部國蔡中郎石碣猶存歷城趙于京詩云郃城

古鼎淪烟墟中郎八分存方趺想字已無矣趙松雪爲  
張侍郎書碑字尙完好可寶也

歷下千佛山有洞名黔婁洞孫淵如觀察偕諸公往遊  
鼓呼祖師洞因文士多窮當合眾供養可爲一噓

山左自泰山嶧山之采李斯篆外有之萊古篆蓋刻于  
石壁者高密李端甫華國作歌云海上海上羣山萃森爽綿  
連一帶突蒼莽之萊丹壁獨峭絕聳翠直凌飛鳥上懸  
崖古篆紛鉤畫岫嶮石鼓文相仿模糊不辨邈與斯溜  
雨剝蝕莓苔長鴻濛未闢更何如靈書穗字從堪想問  
之萊人亦莫能名泰山嶧溪兩處磨崖碑皆後來矣

歷城張北麓文簡辛巳同年詞辨縱橫尤豪於飲拇戰  
轟雷翟鱗江凝周二南樂偕同人訪之西郭書館適他  
出諸君謀小飲檢其筭僅一青衫送質庫沽酒命酌疊  
青字韻七絕似打油體極諧妙匆匆一閱僅記鱗江一  
句云這回氣煞稜頭青稜頭青土語也傳以爲笑北麓  
有二兄赤貧無賴各鬻已久北麓授徒賣文不時周給  
求索偶不遂輒被毆北麓多方借貸以供無怨言近時  
兄弟較錙銖甚至水火若北麓者可風也君明敏多才  
朋好以幹吏期許竟困頓禮闈抑鬱以終

歷城呂衡機生平好友不顧家援例得廣東典史不携



眷奉委入都載洋砲二車其砲一紙團擲地聲響火星  
四射童子所玩也山徑車顛磕砲盡然化烏有家任灤  
口回里時徧視相知貧乏者輒贈以金去家二十里不  
歸視妻子其性情怪僻大都如是友人周溪亭知其性  
故爲借銀慷慨不吝乃暗以所贈轉致其家焉

翟文泉孝廉允升掖縣人工漢隸筆畫如鐵年七十餘  
矣求者不給多囑其子代書嘗以小黃石贈船山上有  
奔馬影石不知得於何處萊故多奇石也船山爲賦詩  
云寸石影天馬橫奔雄萬夫神工真狡獪畫意不模糊  
蹄尾騰空疾風雲變態殊白孟新水活一幅小河圖

畢秋帆嘗撫吾東與曲阜孔府結姻其嫁女也欲以宋  
錢柴窰所謂雨過天青者鑲耳環或得以獻費千金欲  
得雙鴛鴦隨奩具生者難致得其一亦不可養並獲雌  
雄更難惟某地有之縣令懸賞千金竟得焉秋帆没子  
某服闋演優觴客歌舞方酣查抄者突至簿錄後吾邑  
郭龍川在蘇奉委守視見散棄於故紙堆中扇面三四  
皆名人筆迹其子於曲房偶啓畫匣繡履滿中嵌金錯  
采璀璨奪目而粉白黛綠之人星飛雨散矣公勲業文  
章甚著身後籍沒當時年幼未知其詳聞 皇上眷念  
舊臣 賞還地畝若干爲公祭田誠 聖朝寬大之恩

也嫁女在蘇州  
公子官侍郎

翁覃溪爲山東學使聞設筵演優者不赴一日諸大吏  
宴於明湖小滄浪邀公往關先問席間無優乃啓主人  
及至入席酒行樂作未便遽起藩憲某在外獨據一席  
召公闞人詰之謂公安坐觀優平昔之言皆爾行詐命  
左右用杖翁知離座欲起苦被遮留俄而杖畢諸公亦  
任其去矣蓋衆人憎其迂執特挫之以爲笑按試某府  
嬖妾之弟在外巡視往往登號板以搜諸生拒之則置  
衆怒羣起欲毆且以硯飛擊大開啓門出東撫入奏遂  
不終任

濟南知府徐公大榕字惕菴江南武進人乾隆壬辰進士以部員出守萊州善決獄平度州民張子布外出婦爲妻弟羅有良轉鬻子布歸往詰有良爲所毆遽斃妻母在側有良恐母洩其事並毆斃之俄子布蘓遂誣子布毆死其母獄具公廉知其實駁令改正知州郭某堅不從上憲不察公竟以罪繫濟南獄乃割牘尾作詞使所親赴刑部控訴有旨令尙書胡季堂侍郎吉慶赴平度讞獄堂訊日忽霹靂一聲庭宇震搖羅有良惶懼不待詰問將殺母狀盡吐即日復原官調泰安亦有繼子勒死父母移屍以自縊報且誣以姦爲所遇羞愧自

盡公核情節不符親審得實縣令猶固執發棺再驗事  
乃白在山左屢平大獄他人血膚不能決者談笑間得  
其情人稱神明後守濟南公工書作詩至數千首性嗜

硯以百二十硯齋名其集

姪春在川  
候補從九

明李東陽十六歲登進士楊一清登鄉薦年十五惟楊  
廷和十二歲鄉舉咸以奇童目之余辛巳同年孫曉村  
家芳蘭山人其七世祖從兄弟名一脉十三歲中進士  
二甲傳臚後與同榜召對者四十人問以四事一脉風  
度俊偉敷奏明切與二十五人列高等授檢討居史館  
多著作人稱西山先生一脉在明中式不知爲某科

柳下惠朱子註論語云柳下食邑註孟子用莊子註居  
柳下似五柳先生以自號者閻百詩不知柳下地在何  
處據戰國策顏觸言秦攻齊令敢去柳下季壟五十步  
而採樵者死以爲古人多葬食邑壟卽邑所在當在齊  
南魯北昔爲魯有後屬齊此想當然語其實墓在今滋  
陽縣去魯都甚近必不能入齊洪稚存過滋陽謁柳下  
惠墓詩云斷水鄰鄰樹色昏行人駐馬揖空村孤羈我  
下無家淚三點誰招去國魂偶食廟牲齊下邑愁逢海  
島魯東門傷心死士偏寥落曉日樵蘇上冢屯

章邱平陵城有盜跖冢聞河南有盜跖廟祠宇壯麗香

火甚盛凡祀必以妓女之幼者唱黃鶯兒以侑酒有聯  
甚佳惜不全記撮其大畧書之云算是俺不士不農不  
商不賈大睜眼看破冷暖人情說甚麼柳下聖兄垂青  
史任憑他稱皇稱帝稱霸稱王急翻身跳出混沌世界  
且落得花間小女唱黃鶯於極難著筆處寫得如許豪  
邁文人筆下無所不有

金鄉漢山陽郡治昌邑水經注云山有昌邑哀王冢東  
南有范巨卿冢石柱猶在巨卿名式漢荊州刺史與汝  
南張邵長沙陳平子石交號爲死友今大路旁立碑曰  
巨卿故里水經注不言墓碑蔣心餘不知從何得揭本

碑青龍三年立巨卿山陽金鄉人傳素車白馬會葬者  
黃仲則于心餘齋頭見碑額詩云憶昔北上經金鄉車  
襜不捲卧且僵忽如有人促我起道旁碑書巨卿里慨  
然懷古雙眼明欲爲一詩迄未成乃今見此墓碑額似  
索心盟話疇昔直是生平死友心上作星芒墮爲石碑  
穿已失文不完此石亦沒蛟螭淵龍門坊口披沙得離  
垢菴中剪燭看離垢卽心餘先  
生自署齋名青龍三年此碑設鄉人  
翟循縣君薛冀州事與范史殊名件亦補酈生缺渾淪  
製少盤螭痕精堅體仿玉筋文黃初諸刻若優劣以殿  
魏碑差得真文云枯斃潤荆漢治郡威名事奚案世亂



方矜獨行名名高不必循良傳到君章與邢子真欲爲  
死友適得生張元伯後陳平子縱不生交亦堪死不知  
君死友者誰身後百年開此碑滄桑不爛西山石陵谷  
如含峴首悲過眼雲烟欣落手願抱此碑同石友仿佛  
空中走素車來共風前一杯酒慙愧生平結客遊山陽  
空聽笛聲愁南歸定下墳前拜埋骨期分土一邱

東坡小楷不多見長清城內有塔塔內嵌有方石爲東  
坡所書小楷恭謹字畫無損蓋在塔內無風雨劍蝕也  
按其文東坡爲母氏修佛事薦冥福而建塔高五丈自  
城外數里已望見

鄭康成墓在蠓阜界高密安邱間兩邑人士相爭各以爲其土所產而官祭實在高密其旁有村猶名鄭公墓前有祠司農正坐配享者子爲漢侍中孫爲魏孝廉庭階書帶草猶茂其地濱濰風起沙飛往往沒足二三年必須掘除有古柏謂生自漢阮芸臺先生視學山東訪求公後雖村中有鄭姓無譜牒世系可考因無確據遂

輟蓋欲爲鄭公立博士

相傳蘇秦張儀學縱橫之術於鬼谷子鬼谷洞天有五不知確在何處山左蒙山有其一深山巨壑其棲隱與否未可知吾淄縣志載巖山有鬼谷洞亦相與附會

絕無林壑之美岩洞僅可容乞丐亦冒其名可哂也宋  
孝子王樵築繭室於此自號贅世翁濟南李芝爲作傳  
載其事甚詳足爲百世師蘇張何足取有無殆不足辨  
耳

濟南多詩人近時炳著者不錄郝允秀紀昔之以詩見  
者大隱金門十八年東方的的漢神仙誰知譎諫居朝  
日別有龍蛇戒子篇

東方待  
詔朔

太守園林舊有聲簡編千

載識幽情如何月倚風淪句誤署紅蓮幕客名

房太明  
守豹

家累代竝經生祭酒清吟更老成珍重六朝求受賞肯

教世閑掩詩名

明司門  
餘慶

名世由來五百年歷亭靈秀更

誰先誦詩記得當時日磊落人間員半千

員平原半千

造物

鍾靈非一時鵲湖山水古來奇拾遺未作東藩客早有

崔郎五字詩

崔舍人融

元杜風詩邁四唐客中爭識校書郎

不知異代傳居里誰誤昌平作武昌

孟節度簡

蒼崖學士句

何如鴻博人稱富五車自是清詩堪壽世不關金石有

遺書

潘學士昂霄

七聘堂前月欲斜誰從冷淡寄生涯元詩

讀過重重憶始信雲莊有作家

張文忠養浩

胡馬奔騰覆水

濱濟南名士未全湮選來好句從頭數李冠原來是宋

人

李主簿冠

所咏甚多特紀十人

孫協揆寄園總制兩江時 仁宗皇帝萬壽進端硯等

物無珍奇玩好之貢 上深嘉獎以爲有古大臣風及  
林下優游築小園鑿池種蓮尤愛菊歲養千百盆所居  
閣五楹堆菊爲山各種懸牌記名約百種廳事間亦列  
菊山燦若雲霞足迹不入城市門庭清寂無雜賓惟舊  
交東河總督惺甫顏公檢春秋兩汎驗工回便道造廬  
談讌終日家多藏書縹緗插架滿堂滿室督孫曾讀書  
課程嚴密桐江殿撰毓桂年三十餘兄四十餘皆舉孝  
廉猶從汶上周先生百順受業馴至大成胎謀遠矣公  
乾隆乙未進士濟寧人名玉庭兩江總督加東閣大學  
士

諸城劉文清公視學安徽 高宗御賜詩云海岱高門  
第瀛洲新翰林文清刻私印曰 御賜海岱高門第晚  
歲奉 旨往江南壽太夫人沿路不見一客至濟南各  
上憲請謁皆以病辭諸城令以事在省稟見刻卽延入  
相勞苦自謂久居都門離鄉井族間或有倚藉聲勢爲  
非者必嚴懲勿偏徇臨別云無以爲贈欲書字一幅畫  
秀才人情明晨卽發不暇染翰俟到南相寄也至江祝  
畢令家眾綏綏演優觴客忽一日絕早自側門出各大  
憲皆不知亦未預與信芳先生謀先生急追送已在舟  
中問何遽行曰事已畢矣雖奉 上命究屬吾家私事

何得人延又稟今日風色不佳公笑曰汝讀書見江內  
淹死幾宰相乎催令旋暑謝諸公又喚回曰吾家世受  
國恩今 天恩又隆重如是吾老矣無以圖報汝居官  
當刻刻勿忘又曰吾來匆遽未及告假省墓心甚歉然  
汝回朝盡職更須時時修治先人祠墓是時各大僚皆  
立江干候送公舉手作別催船卽行出京時家人李廷  
新製喀拉馬褂公見之怒曰咄汝牧牛兒隨吾在任冬  
裘夏葛已逾分矣尙服此耶公所衣墨漬沾襟至興積  
鞞綻命工縫不另製公生平事事脫俗套真誠自率廉  
亦非矯觀此可知其概語語忠孝大臣家法如是

或耕地得鐵權上刻永樂年造並有濟南府字存之可知當時制度翁宜泉手搨裝潢成卷山西靈石何道生爲題詩云宜泉示我鐵權一土花斑駁光晶瑩諦觀造自永樂歲濟南府字鐫分明伊誰收藏到此物或掘諸地從耕氓得君好古爲洗剔蟬翼墨法摹搨精招要朋好令題句發我思古之幽情伊昔燕師欲南下濟南屹屹孤城嬰尙書姓鐵真錚錚君臣大義能權衡寧使君負殺叔名肯教飛礮轟吾城大書鐵牌挂牌睨高皇帝字軍皆驚博浪一擊惜太早馬首乃代王頭攫天心未肯悔禍亂臣節要必完忠貞至今廟貌照清泚神姿颯



爽何英英吁嗟此鐵真鑄錯革除建文稱永樂生王死  
士孰重輕君試摩挲一權度

李鐵橋東琪有金石癖乾隆乙未夏從濟寧學宮松根  
下得漢膠東王君廟門碑黃小松爲作得石圖江稚香  
孝廉遊新甫草莽中得晉任城太守孫夫人碑黃小松  
爲作新甫得石圖適阮芸臺學使輯山東金石志採入  
孫淵如觀察題曰小寶晉齋秬香在濟南以示劉寄菴  
寄菴題詩中有云天下神物終不朽西晉隸書世尙有  
新甫古柏供樵蘇孫夫人碑鬼爲守未云不能考据徒  
多言黃圖孫頷愧相謝

山東之溫泉一在蘭山名月陽泉浴之能除風疾青州  
牛山西麓亦有溫泉秋谷詩云崔嵬萬古邱石腹出清  
泚不知華清池水色何如此水經註不言沂有溫泉朱  
子澤云地志未指明何書金履詳以爲沂岸深而水淺  
中有達泉冬暖夏冷不曰溫泉按沂岸亦不深應城陳  
士元云周無寒歲秦無暎年古今風氣不同二語不知  
所本曾點明言暮春春服則非寒衣可知論者云地有  
溫泉天亦有溫風乎其爲夏時可知

文登溫泉  
有十處

孟子云原泉混混不舍晝夜註謂有原之泉山東則實  
有原泉漢書晉書並與太山郡萊蕪山下注有原山水

經註謂淄水出萊蕪縣西南原山下世謂之原泉今原  
山南有分水嶺其水東流爲淄西流爲汶

地志所未詳者賴詩以傳張綱孫新甫關云夜出見山  
火炎炎石閭剛急走新泰邑漢之東平陽迢迢隔泗水  
霜坂五里長雖然水澤涸其流還湯湯逾波經古道衰  
柳淒成行蕭蕭悲風生冢墓吹白楊石虎與石馬跡是  
尙書郎始經新甫關蹠蹠崔家莊人烟濕頽壁饑鳥竄  
空梁厓脚苦不高潭水濺我裳何以慰行路仰視天蒼  
蒼蒙陰云土人邀我坐率爾意綢繆口陳水簾洞上有  
鬼谷幽再獻雲巖茶色如百羅柔言風土甚悉

諸城劉文清公以書名天下有硯甚佳爲史繹堂攫取  
紀曉嵐先生閩中亦攫繹堂硯去繹堂以他硯贖之前  
輩風流跌宕猶可想見曉嵐題詩有云昔我掌烏臺石  
庵贈我硯肌理縝密中隱隱鋒芒見今歲司文衡適與  
繹堂伴此硯復贈余粹溫金百鍊是文清曾以硯贈文  
達矣文達又有詩記文正公硯硯材何用米顛評片石  
流傳授受明此是乾隆辛卯歲醉翁親付老門生詩筆  
之古如見唐人

吾家研村老人得石峯巒參差秀聳命曰硯山取米襄  
陽得李後主硯山之意徧徵詩惟喜先大父小山公詩

惜未存稿四叔祖輝吉公亦有詩存集中亦未帶來姑記之以存當年故實

趙松雪遇筆有宛轉如意者剖之取其精毫別貯萃三管之精令工摠縛一管則真草巨細無不如意諸城劉文清公石庵破新筆自揀精毫加束縛不付工人揮灑有得心應手之樂與松雪同一用心

友人周東泉贈予硯黃莘田舊物也莘田詩才淹雅宰四會以耽硯被劾嘗以硯贈紀文達公公題以詩云詩人藏十硯憔悴卧蓬廬零落惟餘此殷勤遠寄予槐廳供視草藜閣伴簪書一片寒陵石相看未忍疎

田山舊過郟城云夕陽郟子國禿柳問官亭臨川李巨  
來汶上遇雨云沙淨句須國山低冉子祠皆紀吾鄉典  
使讀者如身歷其境潘次耕上漁洋云尙書天北斗司  
寇魯東家是時漁洋爲刑部尙書人以爲工濟東道孫  
公星衍不近女色酷好男風有僕名郭芍藥常侍宴飲  
洪稚存歲暮懷淵如云郭芍藥詩成本事鄭櫻桃舍作  
安居郭芍藥鄭櫻桃前輩以爲人名佳對用來恰合

新城王祖肅宰江南武進識黃仲則景仁於童子時觀  
察劉松嵐于黃歿刻其悔存軒集仲則與吾東益都李  
南澗曲阜桂未谷交善未谷得山谷詩孫銅章以贈仲

則仲則題南澗啖荔支圖云嶺南吏隱足清娛親與仙人解絳襦前有東坡後南澗他年合作兩髯圖又題其曝書圖云積紙晴窗偶一開手披魚粉出秦灰願得太古九枝日更曝胸中萬卷來謁鮑叔祠云誰道人心不可淳此公祠廟至今新能知有母真良友便解分財已古人世事飽看翻覆手短歌聊當送迎神略嫌慷慨龍門筆尙有恩仇氣未馴

陳立帆中丞撫山東觀風有伏生墓光嶽樓等題光嶽樓警句云山光無數逼青天伏生墓亦多佳作要不如前人燒不得腹中書坑不到女中儒爲警策

高密田莊西二里濰河俗呼淮河河上下數百里皆沙  
惟此處水底盡石石有穴圓如碗密排兩行直達兩岸  
昔淮陰侯襄沙阻水於此樹樁破楚兵斬龍苴此可補  
史傳所未及有人於近岸沙中得一物長約二尺寬寸  
半紅綠斑駁紅者勝血綠如鸚鵡中脊隆起而旁殺博  
物者以爲古盛頂所樹微磨之其質白蓋鎗鐵也好事  
者於其處復檢得一銅條盤屈粗如箸又似鳳翅者二  
片皆銅質一小圈非玉非瑪瑙聲清而亮云盛正面鑲  
寶珠者自秦漢至今出于沙土古色陸離人甚珍之

高密城西四十五里有土城餘址甚濶大曰城陰城耕



者往往得銅章售於人碧綠可愛有蓄至三五十枚者  
大者方寸小方三四分不等龜紐瓦紐種種各異篆文  
絕佳不盡可識有曰公孫子攻者似人之字也或地陷  
一穴中藏銅鏡三四百光明無纖翳爭奪取至碎裂

城旁古冢紛列三十餘惟知齊頃王墳餘不能指名或  
於冢旁得金蝦蟆村民集衆發掘露墓門皆石板雕刻  
花紋極精石獅列門左右甚高有訴於縣者即禁之命  
填以土每歲秋晨霧濛籠遠望城墉高豎雉堞歷歷可  
數城上人物往來城樓旁有大柳青翠扶疏宛如畫圖  
蓋古城現影往往有之